

&၎်၎်၎်

ဝံလက်ပျိုရို့ သုခုမရောင်နီ
&၎်၎်၎်

ဝံလက်ဖျိမြို့နယ်အစုအဝေး

ပုံနှိပ်မှတ်တမ်း

မာတိကာ

ကျေးဇူးတင်စာ (ခိုင်ဝဏ္ဏမောင်)

၁။ မောင်သူတ

(က) ကျွန်	၁၁
(ခ) ဆင်းရဲခြင်းစွာ ဆင်းရဲခြင်းကိုရာ အားရပါးရစီးနင်းရေ	၁၂
(ဂ) ဝံ့လက်ပျိုရို့ သုခုမရောင်နီ	၁၄
(ဃ) အလွမ်း	၁၆

၂။ ဒီဒီယာနန္ဒ

(က) ဝေဒနာအယ်လ်ဘမ်	၁၇
(ခ) ငါ့သူငယ်ချင်း	၁၈
(ဂ) အတွင်းဆန်လောက်တကောင်နန်း လတ်ဆတ်သောသစ်သီး	၂၀
(ဃ) မောင်တော	၂၂

၃။ ခိုင်မျိုးလင်း(မြို့ဟောင်း)

(က) မစောဖတ်ဖို့ ကဗျာ	၂၄
(ခ) တော်လှန်ရေးခရီးသည်	၂၅
(ဂ) တထောင့်တညအိပ်မက်	၂၆
(ဃ) တုံးမို့	၂၈

ဝံဟင်ဟိုဂြိုဟ်အပူဂဏ်း

၄။ ဝံသ

- (က) ကုထုံးများမပါသော ထွက်သက် ၂၉
- (ခ) အနာ ၃၁
- (ဂ) ရောက်ဖူးသည် ၃၃
- (ဃ) မပွင့်သိသော ရနံ့သစ်အရုဏ် ၃၅

၅။ မေထွီးသျှင် (ကျိန်းရိပ်မြို့)

- (က) လမ်းပြ ကြယ်စင် ၃၇
- (ခ) အဘာအတွက် ရင်တွင်းဖွဲ့ကဗျာ ၃၉
- (ဂ) အံ့ဩခြင်းကြောင့်ပျောက်ခရေ မျက်ရည် ၄၀
- (ဃ) စိတ်ကူးထဲက အပြုံး ၄၁

၆။ မေယု-မင်းကိုကျော်

- (က) မျက်လှည့်ပြရေ ည ၄၂
- (ခ) ဒဏ်ရာခွဲတမ်း ၄၆
- (ဂ) အတိတ်မိရွက်ဝါသို့ ၄၈
- (ဃ) သွီးနန်းရွှီးရေမော်ကွန်းတိ ၅၀

၇။ ဆရာကျော်

- (က) သမိုင်းသစ် ၅၃
- (ခ) ဒုတိယ နတ်သမီး ၅၆
- (ဂ) ပြာသို(December) ၅၇
- (ဃ) ဂိမ်းအိုဗာ ၆၀

၈။ နေမင်းခိုင်(ကျိန်းရိပ်)

- (က) စုပေါင်းကာကွယ် အဖပြည် ၆၂
- (ခ) သင်္ဃာပန်းသစ္စာ ၆၄

ဝံဟင်ဟိုဂ်ိ သုဉ်ဟေင်ဒို

- (ဂ) အိုအစစ်သို့ ၉၅
- (ဃ) သစွာမဲ့ပန်းသီး ၉၆

၁၃။ လျှာထုတ်ကေ(လဝန်းနီ)

- (က) စစ် 'က' သောပွဲ ၉၈
- (ခ) အလင်းမဲ့ညည့်ရိုင်းတပွင့် ၁၀၀
- (ဂ) အချစ်ဂယ်လာရီ ၁၀၂
- (ဃ) ကန္တာရမှ နွီးထီးပျူငှာစွာကြိုဆိုပါ၏ ၁၀၄

၁၄။ LOSO(လေးမြို့မြို့)

- (က) မောင်ကြီးသျှင် ၁၀၆
- (ခ) မာယာ ၁၀၈
- (ဂ) ဖြေပီးခပါ ၁၁၀
- (ဃ) ခွင့်ပြုပါသခင် ၁၁၂

၁၅။ မင်းသျှင်(ကျောက်ဖြူ)

- (က) ညည့်ရိုင်းကိုယ်ထည် ၁၁၄
- (ခ) ကြိမ့်ခြင်းစက္ကူခြပ်ရိုးတစုံ ၁၁၆
- (ဂ) အလင်းပျော့တမ်ပို ၁၀၈
- (ဃ) ပြည်တွင်းစစ် ၁၂၀

၁၆။ ဆရာမ မြတ်သဇင်

- (က) တန်းထား ၁၂၂
- (ခ) ဝီးရွှင့်ချိန် ၁၂၃
- (ဂ) အိမ်လွမ်းကြယ် ၁၂၄
- (ဃ) အလွမ်းသင့်ကျိန်စာ ၁၂၆

–Asp–

၁၇။ ဖြူလေးနွယ်

(က)	မိုးရိပ်ကင်းစင် အာကာပြင်	၁၂၈
(ခ)	ယုံစားခြင်း	၁၂၉
(ဂ)	တိတ်ဆိတ်သော ဒေည	၁၃၀
(ဃ)	စိမ်းကားသူ	၁၃၁

၁၈။ မုန့်မြိမျိုးအေး

၂	အသံ	၁၃၁
(ခ)	ဝမ်းခဲနာ	၁၃၄
(ဂ)	ငရဲသားပါ ဘုရား	၁၃၆
(ဃ)	မအောင်နွယ်လက်သုပ်	၁၃၈

၁၉။ ခိုင်ရိုးလ

(က)	နီး	၁၄၀
(ခ)	ပြိုင်လောင်းပွဲ	၁၄၁
(ဂ)	ယိမ်းကခြင်း	၁၄၃
(ဃ)	ရင်ငြိပန်းများ	၁၄၅

၂၀။ သျှင်ခိုင်(ရိုးမြိ)

(က)	ကဆုန်/ကျွန်တော်	၁၄၇
(ခ)	ပစ္စက္ခပန်းအယ်လ်ဘမ်တချုပ်	၁၄၈
(ဂ)	ငါက နာနာဘာဝပါ	၁၅၂
(ဃ)	ဒေနီမသိလိုက်သော ကဗျာသစ်စစ်စစ်များနန့် ကျွန်တော်	၁၅၄

၂၁။ သမက်သျှင် (ရရိုးချေ)

(က)	စက္ကူတရွက်ကိုခွဲစိတ်ခန်းပို့လိုက်တေခါ	၁၅၅
-----	---------------------------------------	-----

ဝိမာန်ပျို့မြို့သူပုဂံဇာတိ

- | | | |
|-----|----------------------------|-----|
| (ခ) | ပိုးကျနီသော ကဗျာတပုဒ် | ၁၅၈ |
| (ဂ) | ဒိုင်နီဆောတကောင်၏ရာဇဝင် | ၁၅၉ |
| (ဃ) | ဥဩသံကြောင့် နှင်းစက်ကြွီရေ | ၁၆၁ |

ကျေးဇူးစကား

အိပ်မက်တိထုံမွမ်းနီသော ကောင်းခင်မာ ကံတရားတိ
အရည်ပျိုကျကတ်တေ။ အတွေးစမှားယွင်းမှုက သူရို့အလင်းရဖို့
ကိုယ်က ကျွမ်းဆွီးပီးရရေအဖြစ်။ ဇာသယံဇာတကလေး ပြော
ပိုင်ခွင့်မဟိ။ ယင်းပိုင်နန့် အကျွန်ရို့ရေ အပြုံးခါးခါးနန့် မွမ်းမံ
ထားရေ ဆုံလည်တခုမာ ကံမကုန်နိမစိဘဲ အနိစ္စရောက်လား
ရေ လတစင်းကို အသက်သွင်းဖို့ ကြိုးစားကတ်ပါရေ။

မရှုမလှဒဏ်ရာနန့် ထိုးစိုက်တေ ပက္ခဒိန်အချို့လေး အ
ငြိုးပြင်း မိုးရိပ်မဲမဲတိ အနိုင်ပိုင်းဆုပ်ဖြိုလားစွာ နှစ်ရာသုံးဆယ့်
တရွက်တောင် တင်းတင်းပြည့်လားပါယာ။ ယှဉ်ထဲ အသက်
မျှင်မျှင်ချေရာကျန်ရေ ပညာ၏အလင်းရောင်၊ လူမျိုးတမျိုးအ
တွက် မဟိမဖြစ်လိုအပ်တေ ဘာသာဗေဒ စာပီအရွီးအသားရေ
မသီခင်ဆိကေရာ ကျန်ရေလို့ ဆိုရပါလိမေ။

လှုပ်မရ၊ ရုန်းမရနန့် ဆယ့်ကိုးရာစုလောက်ကပင်
ဘောင်ပျက်ပါလတ်တေ ရခိုင်စာပီကို အကျွန်ရို့မာ လမ်းထွင်ဖို့၊
ယှဉ်လင်းဖို့ တာဝန်အပြည့် ဟိပါရေ။ ယေနန့် တယောက်အား
နန့် မစွမ်းသာဆိုရေပိုင် စုပေါင်းအားနန့် စွမ်းဆောင်နိုင်ဖို့လား
ဆိုရေ ရည်ရွယ်ချက်နန့် အကျွန်ရို့တိရေ တိုင်ပင်နှီးနှောကတ်ပါ
ရေ။

တက်တက်ကြွကြွနန့် အားနုံးက ခံယူချက်တူညီနီကတ်
တေအတွက် အနာဂတ်ရခိုင်စာပီရှင်သန်နိုး၊ ရှင်သန်နိုင်ကြောင်း
ကိုယ်ရို့နိုင်ရေဖက်က အကျိုးပြုချင်ရေဆန္ဒနန့် ကလောင်သျှင်

ဝံလက်ပျို သူဇာပေလေ

‘နှစ်ဆယ့်တယောက်’ပေါင်းပနာ ကဗျာစာအုပ်ထုတ်ဝေဖို့ စီစဉ်
ကတ်ပါရေ။

တယောက်နန့်တယောက် ဝါဒချင်းစိတ်ချင်း မတူညီ
ကေလေး စာပီကိုချစ်တေ ခံယူချက်က တတူရာဖြစ်ပါရေ။ ယေ
နန့် ကိုယ်ကျွမ်းကျင်ရာ လိမ္မာရာဆိုရေပိုင်၊ ဂန္ထဝင်ကို အားသာ
ရေလူက ဂန္ထဝင်၊ မော်ဒန်ကို အားသာရေလူက မော်ဒန်
ဆိုပနာ သဘောတူဆုံးဖြတ်ကတ်ပါရေ။

အစအနတခုကို ဆွဲထုတ်မိရာ ကစာပီမြင့်မှ လူမျိုးတင့်
မေဆိုရေစိတ်နန့် အနုညံ့ဆုံးလက်က ပွင့်အာပစ်တေ ‘ဝံလက်ပျို
ရို့ သုခုမရောင်နီ’ဆိုသော ပန်းပေါင်းစုံပညတ်ကို ကာလသုံးပါး
နန့် ရောမွှိထားစွာဆိုလေး မမှားပါ။ ယေရာလေး အတွဲအကြုံ
ရင့်ကျက်မှု၊ မရင့်ကျက်မှုဆိုရေ ဘဝကုန်ကြမ်းကြမ်းတိ၏ ဗိုလ်
ဆန်ဆန်နီယာမကြားမာ တစုတစည်းဆွဲဖြစ်တေမျဉ်း ဖြောင့်
တန်းယင့်လားဆိုစွာ အကျွန်ရို့ဇာပိုင်သိနိုင်ပါဖို့လေး။ ယေနန့်
ပိုရေ၊ လိုရေ လိုအပ်ချက်တိ ပြည့်ဝနိုင်စီဖို့ ရခိုင်စာပီကဗျာပန်း
ခင်း စိမ်းစိုပါစီ ဆိုရေအတွေးနန့် ဝယ်ယူဖတ်ရှု အားပီးကတ်
တေ ရခိုင်စာပီချစ်သူရို့ကို ကလောင်သျှင် အားလုံးကိုယ်စား
ကျေးဇူးအထူးတင် ဟိပါရေ။

သာစွလေ

ခိုင်ဝဏ္ဏမောင်

(၉၊ ၁၊ ၂၀၁၆)

ကျွန်

မဲမဲပြင်ကေ ငြီးဆောင့်ချင်လောက်အောင်
အပြု သွီးဖူးပျာ။

စိတ်နုနုခတ်လို့ မပြုရေထရုံတိ
ခွာနုနုယက်လို့ သောင်မထွန်းရေ နာရီတိ

အမှောင်ကို အလင်းမာ လှုပ်ကေတောင်
ပက်ခိုးမာ ကျန်ခရေ အသားမာစွာ
ဘို့ တလုံးစာထက် ပိုကြီးဖို့
ငါရို့မာ အရှင်လတ်လတ်ကြီး
အကျောင်းခံနီရ။

လူ့ပြည်ကကောက်ရိုးမျှင်စွာ
အူမစွတ်
တနီတလံလို့ ပြောလိုက်တိုင်း
ပုဂံစွာ ပိုပိုဝီးလားခရေ
ရီကြိုင်ယင်နုနု
မြက်မနုခ ငရို့တိ။ ။

မောင်သုတ

ဆင်းရဲခြင်းစွာ
ဆင်းရဲခြင်းကိုရာအားရပါးရစီးနင်းရေ

မြို့ကြီးကို အရိခွာကြည့်ကေ
သယံဇာတမြောက်တေ
မျက်ရည်တိ ပဲ့ပါလာရေ။

ဘေလီထိပ်မှ ဒေ
လှိုင်သာယာစက်မှုဇုန်အထိ
အတ္ထုပ္ပတ္တိတလုံး ရွှိန်ရေဆိုကေ
မှားရေ။

မိသားစုထမင်းအိုး အချိန်မှန်မှန်
ဖင်မဲဖို့ တာစုနီစွာ
အချေ အချေ မချေရို့
ကျူယှင်လခ ပုံမှန်ရွှိန်စွာ
အနာဂတ်စွာ ဂျိုက်ချေကိုဆွဲပြီးကေ
ပစ္စုပ္ပန်ကို မောင်းနှင်နီစွာ
နှမချေ . . .
ဟုတ်တေ
၂၁ ရာစု၏ အခမဲ့သားကောင်။

သနပ်ခါးကို ပါးမာဖုံးပနာ
နှမချေမာ နုပျိုခြင်းတိကို
လုံချင်ဟန်ဆောင်ခရ

စကပ်တိုတိုဝတ်ထားရေ ခေတ်ကြီးထဲ
နှမချေမာ အသိဉာဏ်ကိုရာ
အရှည်ကြီးထား။

သိက္ခာတရားတိ ဖြန့်ကြနီရေ လမ်းမအထက်
နှမချေမာ ကာယိန္တေ ရွတ်ကျမလားအောင်
ကိုယ့်ကိုယ်စောင့်နတ်ကို
နောင်းနောင်းကိုင်ထားရ

ကံတရားစွာ လိမ္မာတတ်အောင်ရာ
ကကောင်းသင်ပီးရေ။

အီးယောင်ကို လွမ်းလိုက်တေဂိုးချေ လတ်
မျက်ရည်နန့် သွီးထားရေလီညင်း
သံယောဇဉ်ကမ်းခြီကို တတည့်ကြီးဦးတည်ရေ
ငါ့ပါးမာရာ ကျပါ သောကလေ။

မီးမလောင်ခင် ချနင်းဖို့
လောကျစ်ထားရေ ကမ္ဘာကြီးထဲ
သံသရာကို အညှိမတိုးကေ့ နှမချေ
ဒုက္ခပါးလားဖို့
လာ . . .
ငရို့ပုထုဇဉ်ထဲ ခုန်ချကတ်မေ။။ ။

မောင်သုတ

ဝံလက်ပျိုရို့ သုခုမရောင်နီ

မတရားမှုတိကို ထိုးသုတ်
အရူဏ်ဦးကို
ကလောင်နန်းခင်းကျင်းလိုက်တေ။

နှုတ်သွီးမာ ညှပ်ထားရေကဗျာစွာ
အပုပ်အစပ်ဆိုကေတောင်
ငါရို့တိအတွက် ကာမအသားခဲ
ကောင်းခင် မကြိုမချင်း
ဒေအိပ်မက်တိကို ငါရို့ ခြွီမေ။

ကျွံကျလားခရေ ရာဇဝင်ကို
ပြန်ကောက်တင်ဖို့
အိုးမှိုင်းပေနီရေ သမိုင်းကိုပြန်ဖွပ်ဖို့
နစ်မွန်းလားခရေ ရပိုင်ခွင့်တိကို
ပြန်တူးဖော်ဖို့
ဖို့ ဖို့ ဖို့ ဖို့ . . .

.
ထောင်သောင်းမကရေ ဒေဖို့တိကို ပြန်ဖာထီးဖို့
ကလောင်ဝမာ ကျည်သီးအသင့်တပ်ထားပျာ။

ဘဝကို တတောင်ချင်းဖြန့်
အမြင့်ဆုံးနီရာမှာ သီးရေ လောကဓံအထက်ကို
စိတ်ချင်းချိတ်ပြီး ပျံတက်ကတ်မေ
သွီးကရွတ်ကျလာရေ အကွရာစွာ
ဝမ်းရီဆာရိုး မဟိစီရ။

ဟုတ်တေ
ငါရဲ့အားနဲ့စွာ ဝံလက်ပျိုတိ
အနုပညာကို ကိုက်ချီပြီး
အနာဂတ်ကို ပက်ဖြန်းအံ့။ ။

မောင်သုတ

အလွမ်း

နီဝန်းကြီးက
ပင်လယ်ကို ထွန်းညှိ

တောင်တန်းကြီးတိက
တိမ်ညွန့်တိကို ခိုးခိုးနမ်းရေ။

ဇင်ရော်ချေတကောင်
နာမ်စားချေတခုကို မန်းမှုတ်ရေအချိန်
လီနုအီးအီးချေတိက
ကောက်ကို နီလိုက်တေဆိုကေ
ငါ့မာ
စိတ်နုနုကိုယ်နုနု ဆွီးရေ။ ။

မောင်သုတ

&cdllAsmpk

ဝေဒနာ အယ်လ်ဘမ်

အရည်မဟုတ်တေ မျက်ရည်စွာ
အမိ ဆီးရုံတတ်တေနိက
နှလုံးသားမာ လာဝဲရေ

မစိုးရိမ်ဖို့ မှာသံထဲ
စောင်းကြိုး ပြတ်သံတိ ငုတ်ဝင်နီရေ။

အမိ ကျန်းမာရေးထက်
ငါ့ကို စိတ်မထိခိုက်ဖို့အရေး
အစ်မတိ
ကြားမာ password ခံလို့
ရိုးမနုန့်ကစ္ဆပမြစ်ရီတိ သူလျှို လုပ်လို့
ကျကွဲလားရေ ပုလင်းသံမာ
ခံစားချက်တိ ထိယု နီလိမေ။

စိတ်ကို ငရဲ နန့်
ခိုးယူပေါင်းသင်းခံထားရရေ ငါ့အဖို့
ရီပူရီချမ်း တခွက်လောက် အမိကိုတိုက်ချင်ရေ။

ယင်းနီ
အကြောင်းတိုင်း
အကောင်းလို့ မသတ်မှတ်နိုင်ခါ
ဘဝနန့် ငါ ရှင်ကွဲကွဲကတ်တေ။။။ ။

ဒီဒီယာနန္ဒ

ငါ့သူငယ်ချင်း

အိမ်ပြန်လမ်းကို လွမ်းခဲ့ရေကောင်
သူ့အသားထဲမှာ သွိုးစွာ ရီစကေရောရော

လူတိုင်းကိုခင်ကတ်တေ
ငါ့ကိုမချစ်လူက ငါတယောက်တည်းလတ်။

သူ့ကွမ်းကို နှိုက်စားရေခါ
အနုပညာဆန်ရေ မင်းခန္ဓာ
ဒေအရိုင်းကြောင့် ပို့မတတ်စီဖို့တားရေ။

ပါးစကသောက်လိုက်တေ ဆီးလိပ်စွာ
ဘဝမာလားလို့ အခိုးထွက်လိ ဟိရေကောင်

ခြင်ထောင်မထောင်ဘဲ အိပ်တတ်စွာကလွဲလို့
သူ့ဘဝမှာ သွိုးနီဥတိနန်း။

နှလုံးခုန်ဖို့ လူဖြစ်လာစွာလားလို့
ငါကဗျာရွှီးတိုင်း သူဝင်မိန်းရေ

အိတ်ကပ် အတိမ်အနက်ကို
မြှုပ်ရေအခါ ကမ်ထရီးရော့(စ်)
ပေါ်ရေအခါ ချာလီချာပလင်
သူငယ်ချင်း မင်းပေါင်မုန့် ငါ့ကို ငှားပါ

မျက်စိပါလို့ မျက်လုံးမပါ
နားပါလို့ နားရွက်မပါ
မျက်နှာမာ ဝက်ခြံတလုံးနှစ်လုံး
ဒေသုအပြုံးစွာ
ဖိနပ်ပါး သီအိုရီကို ညွှန်းရေ။

အုတ်ခဲကို မွီးတတ်တေကောင်
ကျောက်ခဲကို ရနံ့သင်းနှိုင်းရေကောင်
နောက်ဆုံးပေါ် သမာဓိစာရင်း
ငါ့သူငယ်ချင်းက
တခုကိုလေ့ အပြစ်မမြင်တတ်

မင်းသောက်ဖို့ကော်ဖီကြား
ငါ့ကို သကြားအဖြစ် ရောထားပါ။ ။


ဒီဒီယာနန္ဒ

ဝိမာန်ပျို့မြို့သူပုဂံလေး

အတွင်းဆန်လောက်တကောင်နန့်
လတ်ဆတ်သောသစ်သီး

(၁) ငါ

ပန်းထွာ ဘုရင်မ၏
ဗိဿနိုး မြို့ပျက်



သူမ

နယူယောက်မြို့တော်၏
အခမ်းနားဆုံး တနီရာ

(၂) ငါ့အချစ်

သုဿန်အပြင်ဖက် သာလာဇရပ်

သူမအချစ်

နဝရတ်ကိုးသွယ် စိန်စီနန်း

(၃) ငါ့နှလုံးသား

ဖုန်းတောင်းယာစက တယောက်၏
အဖာ အထီးများ ပဆိုး

သူမနှလုံးသား

ရွှေရောင်ကွပ် ကတ္တီပါ ပဝါ

(၄) ငါ့ကတိ

ဖွဲ့ခွဲမာ စိုက်ထားရေ သစ်ငုတ်

–AspK

သူမကတိ

မြိသားမာ စိုက်ထားရေ ကျောက်တိုင်

(၅) ငါ့သစ္စာ

၀၀၀၀၀၀၀၀

၀၀၀၀၀၀၀၀

၀၀၀၀၀၀၀၀

သူမသစ္စာ

ကြံ့အပြုတချောင်း

(၆) ငါ့ဘဝ

ဟိုက်ဝီးလမ်းက

ပေါင်းမုန့်ပိုင်းတစ

သူမဘဝ

တစ်ယျူး စွန်း

(၇) ငါ့ဖြစ်တည်မှု

ရီလာကိုစတာ

အမေခုံတော

အိသီယိုပီးယားနိုင်ငံ

ဆိုမာလီ ဒုက္ခသည်စခန်း

သူမဖြစ်တည်မှု ၉+၉=

(၈) ငါသည်ပိုးလောက်ဖြစ်၏

သူမသည် လတ်ဆတ်သော သစ်သီးဖြစ်သည်။

မောင်တော

ကြိုဆိုပါရေ သမ္မတကြီး . . .

သမ္မတကြီး ရိုးရာဝတ်စုံ ဝတ်ဖို့လား
ဂေါင်းမာ ထောက်ကျာ ဆောင်းဖို့လား။

သမ္မတကြီး ရထားဆွဲပွဲ ကျင်းပဖို့လား
ကုလ်ဘင် (ရှူးစာ) ကိုင်ပွဲ ကျင်းပဖို့လား။

သမ္မတကြီး ဆီမီးခွက်အက ကြည့်ဖို့လား
ဆာရီ အလှကြည့်ဖို့လား။

သမ္မတကြီး စည်ကြီးသံကို နားထောင်ဖို့လား
သောကြာနိ အသံကို နားထောင်ဖို့လား ။

သမ္မတကြီး ငါးပိ ချက်ဟင်းစားဖို့လား
အမဲသားဟင်းစားဖို့လား။

သမ္မတကြီး မေထွီးယေဝတ္ထု နားထောင်ဖို့လား
အာရဗီ အကြောင်းနားထောင်ဖို့လား ။

သမ္မတကြီး သာလီစွ လှိုနှုတ်ဆက်ဖို့လား
ဘီရ် မိ လာ ဟိမ် လှို နှုတ်ဆက်ဖို့လား။
အစုံဟိရေ ငါ့မြို့သို့လာလည်ပါ

သမ္မတကြီးလာကေ . . .
ရဟတ်ယဉ် စီးလာပါ
(ငါမြို့မာ လမ်းခေါင်လို့)

သမ္မတကြီးလာကေ . . .
ထောပါတ် ဒိန်ခဲ စားလာပါ
(ငါမြို့မာ အစာယှားလို့)

သမ္မတကြီးလာကေ . . .
အစောင့်အရှောက်တိခေါ်လာပါ
(ငါမြို့က အန္တရာယ်များလို့)

သမ္မတကြီးလာကေ . . .
ဝတ်ကောင်းဝတ်လှဝတ်လာပါ
(ငါမြို့မာ နွမ်းပါးလို့)

သမ္မတကြီးလာကေ . . .
လူ့အခွင့်အရေးကို ကျက်လာပါ
(ငါမြို့ကသွီးညှိနဲ့မပျောက်လို့)

သမ္မတကြီးလာကေ . . .
ဘာသာပြန်တိခေါ်လာပါ
(ငါမြို့က မျက်နှာစိမ်းဆန်လို့)
မောင်တောမြို့မှ လှိုက်လှဲစွာ ကြိုဆိုပါ၏။ ။

ဝိပဿနာသုတ်

မစောပတ်ဖို့ကဗျာ

ရင်ခုန်သံ တူညီခကတ်သလောက်
လက်မြှောက်လို့ ထွက်လာမိသူပါ
ဆာဟာရ ခရီးသည်တယောက်၏
နှလုံးသား ဒုဗ္ဗိက္ခန္ဓရုပ်ကို
ဇာသူလာ ကုစားပီးနှိုင်းပါဖို့လေး။

သိင်္ဂီရဝတ်ရည်ချေတစက် သောက်သုံးဖူးခ ချင်ပါယင့်
တိမ်စိုင့်ဖြစ်တိုင်း မိုးမရွာနိုင်ရေခါ
ပုဂ္ဂလိကခံစားချက် ဆိုစွာလေ့
ဘဝမာတန်ဖိုးနည်းရေ ပြဋ္ဌာန်းချက်တခုပါရာ မစော။

မြင်းမိုရ်တောင်ကို လီမတိုက်ရအောင်လို့
လက်ဝါးနန်းလှေ့ မကာချင်ပါပျာလေ
ကြင်နာကင်းစွာ မြတ်နိုးမိခသူတယောက်၏
လောကဝတ်မဆန်ရေ အကြောင်းပြချက်တိက
မစောအတွက် နားဝင်ချိုနှိုင်းဖို့ကား မဟုတ်ယေ။

ခွင်မျိုးလင်း (မြို့ဟောင်း)

အဝီစိနန်ဘဝင်
တထပ်တည်းမကျနိုင်မှန်း သိကေလေ့
ငါ့နိစဉ်ဘဝထဲက မင်းစွာ
သတိရရေဆိုစွာထက် ပိုနီသူပါ။

ခါးတမာ မချိုနှိုင်းခြင်းက
နဲ့သာမိုးဖို့ အကြောင်းခံကားမဟုတ်ပါ မစော
အပြုံးနောက်ကွယ်က မရွှင်နိုင်ရေ နှလုံးသားကို
မင်းမြင်နိုင်ပါစီဝေ။ ။

တော်လှန်ရေးခရီးသည်

ကျိန်စာသင့်အောက်ဆီဂျင်တိကို ယှူယှိုက်ယင်း
ဝိမုတ္တိအလင်းတန်းချေတခု ရှာနိမိခ။

ကျွန်ဗိုင်းရပ်(စ်) ကူးစက်ခံထားရရေ
အာရက္ခ ဂြိုဟ်ကမ္ဘာထဲ
ကယ်လိုရီ ချို့တဲ့နီရေ သမိုင်းတိ
ဝိတာမင် ချို့တဲ့နီရေ မြို့ပြတိ
ပရိုတိန်းမဟီရေ ကျောက်ဖြစ်ရုပ်ကြွင်းတိ
သကြားဓာတ်မဟီရေ ဘဝတိ
တိ တိ တိ တိ . . .

ဒေ အနိဋ္ဌာရုံတိနန့်အလိုမတူဘဲ ပေါင်းဖက်
ထမင်းလက်ဆုံလေ့ စားဖူးခလီယင့်။

ရွတ်မြောက်ခြင်းအဘိဓာန်ထဲက အဖပြည်ကြီး
ပေယျာလကံ အပြုခံထားရလီရေခါ
ပင်လယ်ပျော်ဝံလက်ငှက်အော်သံက
အိမ်မက်က လန့်နိုးစီခရေ။

အဝေ

ကျဉ်းမြောင်းပုပ်ဟောင်နီရေ ကျွန်ဥခွံကို
ခြွေဖျက်ဖောက်ထွက်ဖို့ ခရီးကကြမ်း အမှောင်လမ်းပင်ဖြစ်စီ
ရောင်နီကိုမှန်းဆ
သီဆုံးခြင်းမဟီရေ ယုံကြည်ချက်အတွက်
လာ . . . ငါရို့ ချီတက်ကတ်မေ။ IIII

ခိုင်မျိုးလင်း(မြို့ဟောင်း)

တထောင့်တည အိပ်မက်

ဘဝကိုယ်တိုင်က

Post Modern ဆန်လွန်းလီရေလား

အမြင်မာပြောင်မြောက်သလောက်

အတွေးရ နက်လိုက်တေပင်။

တခါတခါ မဖြစ်နိုင်ရကောင်းလားလို့

လောကဓံကို ခါးလောင်းတိုက်စိန်ခေါ်ပစ်မိရေ

အန္တပုထုဇဉ်တယောက်အတွက်

ကံတရားဆန်းကြယ်မှုက အစိန္တေယျရာ။

သရီချောင်းကမ်းထောင်းကလူ

ကစ္ဆပနဒီကိုအထင်ကြီးစွာ သိမ်ဖျင်းမှုမဟုတ်

အမြင့်ကိုရောက်ခါမှ အများကြီးမြင်ရဖို့

ပျံ ပျံ ပျံ ဇကုန်ပျံ

ဘဝင်ကိုရာ လီမဟပ်စီကေ

ဆရာ မိဖရို့ အားပီးစကား

ဗာရာဏသီလား ပုံပြင်လား။

ဘဝကို ရသပေဒသို့တင်ကြည့်ရေခါ
၂၂ ရာသီစာ ဟင်းပေါင်းအိုးထဲ
ချိုတဝက် ငန့်တဝက် ပျာတဝက်
ခါးသက်သက်အရသာတိလေ့ တို့ရေဝါ။

အရုဏ်လင်းချိန်မှာ မှောင်မိုက်
အများ၏ အထင်သေးခြင်းသရဖူကိုလေ့
မြတ်နိုးစွာ ခံယူမိတတ်ခယာ။

ပစ္စက္ခ အာသာဆန္ဒတိကတော့ကေ
ပန်းဥယျာဉ်လေ့ စိုက်ဖူးရေ
ကျော့ဝါသျှင်တန် ပိုင် ဖြစ်ဖူးရေ
ဟိုချီမင်း ပိုင်ယောင်လေ့ ဖြစ်ဖူးရေ
ချေဂွေဗားရားအဖြစ်လေ့ ဝင်စားဖူးရေ
တကိုး ပိုင်ယောင်လေ့ ကဗျာတိစပ်ဖူးရေ
ဝိန်းရွန်နီပိုင် ဘောလုံးလေ့ကျောက်ဖူးရေ။

၇။ . . .
လက်တွဲဘဝမာကား ယင်းအိပ်မက်တိစွာ
ပကတိ အိပ်မက်အတိုင်းပါရာ။ ။

ခိုင်မျိုးလင်း(မြို့ဟောင်း)

တုံးမို့

ပိဇကြောင့်
ဇိဝဆက်နီရသူပါ။

ဂိလာန အဖမြီအတွက်
နောက်ဆုံး ထွက်သက်အထိ
ပါရမီ ဖြည့်ပါရစီ။ ။ ။

ခိုင်မျိုးလင်း(မြို့ဟောင်း)

ကုထုံးတိမပါသော ထွက်သက်

စနစ်တကျတွေးခေါ်ခြင်းက အစ
ပါးချိုင့်ခွက်များနိမ့်ဝင်လားရခြင်းအဆုံး
တလုံးမကျန် အားလုံးကို ချိုးခေါက်သိမ်းလိုက်တေ။

ပျံသန်းမှု (အထား အသို့) အရ ငါ့ဩဇာပထဝီမဖြစ်ခင်
မွဲရိုးများလွန်းသော ကိုယ်အိမ် လည်ပတ်ခြင်းအတွက်
တမိုးသောက်လုံး ဖွင့်ဖတ်ခမျက်ရိပ်တိ
တပေါက်ပေါက်ယိုစီးသောချွေးကို
ခပ်သောက်တတ်ခပျာ။

အသစ်စက်စက်ပန်းစက္ကန့်ပျိုရို့ အသံတိန်းမှောက်လဲ
သင်္ချာမနိုင်သော စရိုက်ပြန်သက်ရောက်တခု
မရဏနန့်အလွမ်းသင့် ဒုက္ခများဖတ်သီအပြုံးတိ
ဆားတစွက်နို့ပြင်က ဆာလောင်မှုအိတ်ပေါက်နန့်
အသွက်ဆုံးအသံထဲ ရာဂကို မီးရောင်ထိုးကြည့်ရေ
သွီးခုန်နှုန်းတိအလန့်တကြား ခုန်ထွက်လားခယင့်။

အကြိစတိဖုံးအုပ် လွဲချော်ခြင်းပြစ်မှုကို
ခပ်ကြမ်းကြမ်းအမှိုက်ရောင်ဆမ်းကြည့်မေ
ဝါသနာမတူလို့ ချွတ်လျော်ပစ်တေလက်ကညှီလွန်းရေ
အသက်ယှူမြွန်အားလုံးက ရပ်စောက်ကို မှိုင်လို့
ဆရိန်းတိနားမကြားစွာ နှစ်ပေါင်းကြာပျာယေ။

ဥပုသ်မစောင့်ဖြစ်တေ အညွန့်တလူလူအကုသိုလ်ပန်းများ
တပိုင်းသီခန္ဓာနန့် သံလမ်းမာထိုးအိပ်သောရထားများ
နိမိတ်တိပြတ်တောက်ပြတ်တောက်နန့်
ဓာတ်ပျက်ပါလတ်တေ
သွီးမလျှောက်သောဥတုကို မျက်ရည်နန့်ထုံးဖွဲ့ပစ်ဖို့လား
အားနာဖို့ကောင်းလိမေ ကိုယ့်လူ။

ယင်းပိုင်နန့် . . .
လှလှပပ လီဗာကုန်နင်းလာခ ‘ကျား’တလုံးဇောထဲ
အပတ်စိုင်တင်ဆက်နီကျ သုံးပင်လိမ်ရိုးသားမှုအတုတိ
ကောင်းစားနှိုင်းလွန်းယဉ်။။ ။

အနာ

အဂတိရို့အလျင်ကထက် စိမ်းစိုပါလတ်တေ
တဆတ်ဆတ်ခြောက်နွမ်းရ နှင်းခိုရိပ်က
ညည့်ခိုးသောလရောင်တိ တိန်းဆိတ်လွန်းရေထော
ယုတ္တိကို ဇာနန့်ကာလာတင်ဖို့လေး။

ရာသီမြစ်မာ အရှင်လတ်လတ်သဂြိုဟ်ရ ငတ်မွတ်ခြင်းတိ
ကျောက်ဖြစ်စအနာကို
ညထွက်ကံတရားနန့်ကုစားပါလတ်စွာ
ကျွန် ကျွန် ကျွန်လို့
ဂေါင်းတင်ထမ်းရောင်းသော ငါးပုပ်သည်မြို့ပြမာ
ပွားမိတ္တူရင်ဘတ်နန့် စည်းပတ်တီးဖြိုကြည့်ရေ
သရုပ်ဆောင်မှုတိုင်း လူမိုက်တော့ဖြစ်ယင့်။

အဖက်ဖက်က ကျွံကျပါလတ်တေ သားမွီးကိုယ်ထည်တခု
ဆောင်းအန်ဖတ်ထဲဗီတာမင်တိ နည်းပြီးယင်းနည်း
ယင်းပိုင်နန့် . . .
သွီးမသန့်သောအပျိုစင်ခန္ဓာက အမြောက်သံတိစွာ
မိုးမှန်လီမှန်နန့် ကိုယ်ပျောက်ဥယျာဉ်ထဲဝင်ပုန်း
ရသလွန်ကြက်ခြံတိ များလိုက်တေ လတ်။

တစ်ကပင် ကိုးအထိစွီတွက် ဖရိုဖရဲရလဒ်နန့်
ညီညွတ်မှုမဟိသောအလင်းထဲ ဘောင်းဘီဝတ်မိုးတိမ်တိ
လမ်းလျှောက်ထွက်အာဟာရပင်လယ်မာ အတိတ်ကိုထိုးစိုက်
ဝှက်ဖဲတချပ် အောင့်နမ်းရအနာဂတ် နှင်းပွဲဖို့လိုလိမေ။

ကြည့်လိုက်ကေ
သမိုင်းညွှန်တိဈီးမတည့်စွာ ကြာယာပ
အမြတ်ရဖို့လားအထာနန့် လကျယ်လုပ်ကြည့်မေ
ဓာသွားထက်ကနုတ်ခွမ်း
နုတ်ခွမ်းထက်က ဒေါသမာ
ဒေဘဝစွာအဝတ်မလဲသိကြောင်း နားလည်ပီးပါ လောက
အားလုံးကိုပြန် ပြန် ပြောနီရစွာ
အလျင်ကထက် ညောင်းရေ။

စစ်အတွင်းက အသံတိန်းခိုကပ် ဖနောင့်ရာတိစွာ
ရနံ့သိုးကောင်းခင်ထဲ ဘဝကိုခေတ်ဆန်ဆန်ဝတ်ကြည့်ရေ
အလိုမတူပေါင်းဖက်ရ မဆွတ်ပဲကြွီသောနိခါးတိ
လှလှပပ စိမ်းလန်းနီကတ်ယင့်။

အိန် . . .
အထစ်ထစ်အငေါ့ငေါ့နန့် တခုလေးမရသိစွာက လွဲလို့
ပန်းဆိပ်မိပျားတကောင်မုသားထဲ
ဟောင်းသမိုင်းတစောင် ပုံမနှိတ်ဖြစ်စွာကြာပျာယေ။ IIII

ဝံသ

ရောက်ဖူးသည်

အဉ္စနကစ္ဆပ နတ်မြစ်မယူ
 သာစွဖြာဝီ လေးဝတီကို
 ဘီစီသုံးထောင် နှစ်အခေါင်က
 ရောင်ဝါထွန်းပ အာရက္ခဟု
 ပညတ်ခေါ်တွင် မျိုးနွယ်ဝင်ဖြင့်
 ထင်ပေါ်တခေတ် ပန္နက်စိုက်သော်
 ဆိုက်မြိုက်ရောင်ဖြူ ကျွန်းဇမ္ဗူတွင်
 သူတမူခြား သာကီဖွားတည်း . . . ။

သာကီမျိုးမှန် မြင့်မြင့်ကြံ့၍
 ကိုယ့်သိုက်ကိုယ့်မြုံ ပွင့်မျိုးစုံသည်
 ဖုံလုံကြွယ်ဝ မကြောင့်ကြသို့
 သုတရသ စောင့်သီလနှင့်
 ပမာခိုင်းနှိုင်း ကျုံးတံတိုင်းရို့
 ဆိုင်းမြိုင်းထည်ဝါ အံ့ဖွယ်ရာဖြင့်
 သာယာရွှင်လန်း လေးခေတ်ထွန်းချိန်
 လွမ်းမိုးကခံ ငြိငြင်ပြန်သော်
 ကံနက္ခတ်ကျိုး မျက်ရည်မိုး . . . ။

ပွင့်ခလက်ကျန် တည်ဟိပြန်သည့်
 သမိုင်းတွင်ဖြိုး မော်ကွန်းထိုးသို့
 ကျိုးပိုင်းတွန့်ကြံ မြောက်ဦးမြိ၌
 စိတန်းအလိုက် ရိညိုကိုက်၍
 ငိုက်စိုက်ညွန့်ပြုန်း တောင်ဂေါင်းတုံးနှင့်
 သုံးလုံးထွဋ်တင် မြတ်စီသျှင်နှင့်
 သင်္ခန်းတန်းဆောင် ပြဿဒိထောင်သောင်း
 မှောင်မိုက်အတိ ဒုက္ခပိပျာ
 တို့မြင်မကောင်း ရင်ဟောင်းလောင်းတည်း
 ကျောင်းပြိုအိုအို သိမ်ငုတ်တိုလည်း
 ညိုရောင်ခိုတွဲ ဟောင်းပြာမဲ့လျှက်
 ဆွဲစီးသံသရာ ဆိုးကြမ္မာကြား
 ဗျာဒိတ်လည်းဆွီး ကယ်သူဝီးသို့
 မီးလောင်ပြာတိုက် လွန်ခေါင်ဆိုက်သည်
 စိုက်ထီးနန်းဝီ နန်းရာမြီသို့
 သီမပျောက်ခင် မြင်ဖူးချင်လို့
 တွင်ကျယ်လှိုင်းထန် သောကန္တံက
 ကြံစည်အကျွန် ရောက်ခီပြန်သော်
 သန်ဖက်တန်းလန်း သွီးရောင်လွမ်းပျာ
 ဝမ်းနည်းပက်လက် မျက်ရည်စက်ဖြင့်
 သက်ငင်ယှိုက်သံ ပြည်လုံးညံသည်
 ကျွမ်းရင် မြို့ဟောင်း မြင်မကောင်းတည်း . . . ။ ။

ဝံသ

မပွင့်သိသောရနံ့သစ် အရုဏ်

အဆုံးထိတွက်ကြည့်ကေ
အားလုံးလေး သမိုင်းသားကောင်ရာ။

ပကတိ အလင်းသီဖန်အိမ် ဖန်သားပြင်ထက်က
ဝိပါကခြံသွက်မှုထဲ ကိုယ့်အပူနုနုကိုယ်ပျိုဆင်းလာကတ်
သတ္တိတဖက်နုနုမိုးဖွားခ ပစ္စက္ခဝဠာပြင်ကသန္ဓေသားတိ
အခွံစည်းစိမ်ဘဝနုနု နွမ်းရိ ညှိုးကြီနီကတ်ယင့်။

စိတ်ကန္တာရတောမာ တလမ်းလုံး ရီငတ်ပါလတ်တေ
မြင်နီကျအရိပ်ကို အနိမ့်ဆုံးအသံနုနုတီးခတ်ကြည့်ပါရေ
သံစိုင်မသိခ တောခြောက်သံတိစွာ
စိတ်ပန်းချီတချပ်နုနု တခမ်းတနားကိုမဟိ
သုညတလုံးကောက်ကြောင်းမာ
လွဲချော်မှုအနိစ္စကိုဂျည်း ပီတိနုနုဖသောက်
အဆီကျဓာတ်ရို့က အရိုးထိအောင်အီးရေ။

ယင်းပိုင်ပျာယေ . . .

တနံတလျား အထင်ကရမှန်းချက်တိ
အရောင်ပြောင်းကောင်းခင် သဘင်မှားဥတုနုနုအတို့မာ
ဇာလောက်ပင်ကြိမ်ကြိမ်လှန်ချိုး ဂျိုကာမပါပဲဒေါင်းဖို့လား
ဒေညည့်ကိုက မှောင်မိုက်လွန်းပါယင့်။

ဇာတာပြိုနုကွတ်အရ
အရည်ရွမ်းဥပါဒါန်ကံဆိုးကို တဝကြီးသောက်လို့
အတိတ်ရင်ခွင်ထဲ မညောင်းမပမ်း ခရီးဆက်ပါလတ်တေ
အရိပ်ငတ် ထိုင်ခုံပျောက်လိုအပ်ချက်ကို
ပါဝါများများတိုး ဝိဘဇ္ဇမိုင်ခရိုစကုပ်ကပြောရေ
သင်ရို့ခန္ဓာမာ
ဝိရောဓိကို ဇာလောက်ဆင်ယင်ဖူးယာလေး လတ်။

ကောင်းပါယင့် အသျှင်
ယူဇနာအကွာအဝေး တောက်လောင်ကျွမ်းဆွီးရမှုအတွက်
အသာအယာ
ရာသီပြန်ချိန်မှ အပျဉ်းထောင်တတ်တေ အတ္တကို
ဆန္ဒနုနုရင်းဖောက် လျှော်ဖွပ်နှိုင်းကတ်ဖို့ဆိုကေ
မာယာဆမ်းပါးနပ်မှု ညည့်ပရိယာယ်တောက
လေးဝတီရင်ရိုးတိ အရုဏ်သစ်ရနံ့ ဖူးပွင့်နှိုင်းရုံကလွဲလို့။ ။

ဝံသ

လမ်းပြကြယ်စင်

ကြယ်ချေဝေ
မနိုးထိုးရေ ကြမ္မာတရား
သမိုင်းတိကို ခါးစီလားဝေ။

ငါ့ရဲ့တိ နိုးထခြင်းတိဖြန့်ကြက်
မြီစာခက်တိ မဟုတ်ခပါ
မျက်နှာစာလှရေ ကောင်းခင်ယံမာ
မင်းရိုးဆွဲခရေ ကကြိုး
စည်းရုံးခြင်းတိတိုးလို့
ငါ့ရဲ့သွေးတိ တေးဆိုနီကတ်ပျာ။

ကြယ်ချေဝေ . . .

မညက်ညောရေ မြီသားအတိထဲ
တခုအမှားနုနုလေ့ ခွဲခွာမဟုတ်
မင်းမကြံ့ခပါ

ရီမြီတဝိုက် လှိုက်လှိုက်လှဲလှဲလက်တိ
ညီစီ . . . အီးစီ
မြဲစီ . . . ခိုင်စီ
သင်္ကေတတိ ဖန်ဆင်း
သင့်ညည့်၏အလင်းနုနု
နှိုးထခြင်းတိ ဟိနီကတ်တေ။

ကြယ်ချေဝေ
ရက္ခိတရီ၏သွီး နီရဲရဲနုနု
ရွီးခြစ်ခရေ ကျောက်စာ
နောက်ကမ္ဘာထိ စွဲကျန်
ငါရို့အားလုံး၏
ရင်ဘတ် ကောင်းခင်ယံမာ
ပျိုမြစ်တောက်ပ ကြယ်စင်ခရေညည့်တိ
ထာဝရ ဖြစ်တည်နီလီယင့်။ ။

မေထွီးသျှင် (ကျိန်းရိပ်မြီ)

အဘာအတွက် ရင်တွင်းဖွဲ့ကဗျာ

အဘာ . . .

ကာရံမဲ့နိရက်တိကိုချေပ
ရိုးယှင်းရေ ချစ်ခြင်းတိစရေနီရာ
. . . အနာတရတိခဝါချ
အဘာဇာလောက် နှုတ်တိတ်ခပါလေး . . . ။

အဘာ . . .

နှစ်သိမ့်ခြင်းအပြုံးထဲကနောက်ကျန်ခြင်း
ပီတိအသွင် ကျေနပ်ခြင်းတိစရေရင်ဘတ်
. . . ဒဏ္ဍာရီအတွက်မဟုတ်
အဘာ ဇာလောက် ခွင့်ရွတ်နီတတ်ခပါလေး . . . ။

အဘာ . . .

ပက်ခုံးကောင်းကောင်းတခုက
သမုဒယ ခြံဆင်းတိဖန်ဆင်း
နာကျင်ခြင်းကင်းစီခစွာလား
ပဲ့တင်ထပ်နီရေ မေတ္တာအမြိုက်ဆီး
လှိုက်ဆွေးခြင်းသိုသိပ်
အဘာအရိပ်မာ
အဘာရင်ခွင်စွာ
အဘာ စီညွန်းရာမာ
ကမ္ဘာကြီးပိုလှစီဖို့ပျာထင်ပါယင့် . . . ။ ။

မေထွီးသျှင် (ကျိန်းရိပ်မြီ)

အံ့သြခြင်းကြောင့် ပျောက်ခရေမျက်ရည်

သိက္ခာတိအဖတ်ဆည်ဖို့
ပထမခြံလှမ်းအဖြစ်
ငါ့ကို မရဏတန်းခါးနားတိုးပို့ရေ။

ကျိုးကျလာရေ
ဥပဒေတာရိုးအောက်မာ
မှန်ကန်ခြင်းရီကြိုင်တပေါက်တောင်
ငါ သောက်ခွင့်မရခ။

ငါ့သမိုင်းမာ
သူထိုးပီးလိုက်စွာ ကမည်းကနှစ်လုံးတည်း
'သီဒဏ်' လတ်။
ကမ္ဘာကြီးတခုလုံး မှင်သက်စီခပျာ။

ယင်းအချိန်
မီးတောက်တေ ကန္တာရကြီးပြပါဆိုကေ
ငါ့ရင်ဘတ်ကို ဖွင့်ပြချင်ယင့်။

ယင်းနိက
ငါ မျက်ရည်ကျဖို့ မိန့်ခရေ
လောကဓံ၏ လှည့်ဖြားမှုကို အံ့သြလို့။ ။

မေထွီးသျှင်(ကျိန်းရိပ်မြီ)

စိတ်ကူးထဲက အပြုံး

နုပျိုခြင်းကို ချပြဖို့
အတိတ်ကအချိန်ကို တနားငှါးပါ
ငါကပျော်ရွှင်ခြင်းကို စာလုံးမပေါင်းတတ်တေကောင်ပါ။

အပြုံးနုနဲ့ အငို
မချိုရေ ကံတရား
ငါ့မာ
ဆန္ဒတိ ပါးပါးလာရေကောင်ပါ။

ဖွင့်ဟရဖို့စကား ရင်ထဲထားမိလို့
ပြည့်သိပ်လားရေ တိတ်ဆိတ်ခြင်း
ဓာတ်ပျက်နီရေ စက္ကန့်တိအောက်မာ
သရုပ်မညီရေ သဘောစိတ်နုနဲ့ကောင်ပါ။

ဆန္ဒနုနဲ့သဒ္ဓါ ယုံကြည်ရာစိတ်စွဲ
မရဲရေသိမ်ငယ်ခြင်းနုနဲ့ဘဝခက်ဆစ်
နှုတ်တိတ်ရွက်နီရေ ကောင်ပါ။
မိန့်ထားပြီးသား
အနာတရတိသိမ်းထားရေအတိတ်
ခပ်မဆိတ်သာနီယင်း
လှလာဖို့တရက်အပြုံးနုနုနုနုဆက်
နက်ဖြန်တွက် တန်းခါးဖွင့်ထားရေကောင်ပါ။ ။

မေထွီးသျှင် (ကျိန်းရိပ်မြီ)

မုက်လှည့်ပြရေည

မှိတ်တုတ် မှိတ်တုတ်နန့်
ဥပေက္ခာမီးအိမ်ထဲ
အတိတ်ကိုခြံဆန့်ကြည့်ရေခါ

စုတ်ပြုနီရေဖိနပ်တစ်ရံလှေ
ကြွရွှင်ပနာခမ်းနားလို့နီလီပျာ။

မိုးရိပ်ချေတိတထပ်ချင်းခွာချဖို့
မုက်ခွံစုံအားတင်းလို့ပိတ်လိုက်တေခါ
အာရုံကိုအတွေးကလွမ်းမိုးလားပျာ။

သံဓိဋ္ဌာန်တိပြိုကွဲမတတ်
အယှုံးနန့်ကျင်ကိုင်ခရရေပွဲမာ
အမင်ကပြောခရေ
'ငါ့သားကယောက်ျားချေ'

မုက်ဝန်းခွင်မှာမုက်ရည်မစိုမိဖို့
သဘာဝကိုဖန်တီးကတ်တေခါ
ကန္တာရမာ ပန်းပျိုးခမိရေ
ခြံလှမ်းတံစုံမပြိုလဲစီဖို့
ပစိကိုက်ပနာအားတင်းလိုက်တေခါ
လွဲမှားရေလက်ခုပ်သံတိကြားမာ
ယောက်ျား . . . လို့ဟစ်အော်နှိုင်ခစွာ
အမင်သား သီပျော်ပါပျာ အမင်။

ကိုလိုနီ လူမျိုးကြီးဝါဒမြဲဖို့
လက်ဝါးကြီးအောက် လောင်းရိပ်မပျောက်အောင်
ကင်ပွန်းတပ်ဖက်ဒရယ်ကို
ဒရိုင်ဘာလမ်းလွဲမောင်းဖို့ပျင်နီယာ

၂၀၁၅ စိုးကွက်ထဲမှာ
အနာဂတ်ကို ကြိုးကွင်းစွပ်ခကတ်လို့
တော်လှန်ရေးအရင်းခံဘဝတိ
သရဏံဂုဏ်တင်ရဖို့ထင်ရေ။

ငါးနှစ်တာသမိုင်းကြောင်းကို
အာဂုဏ်ဆောင်ခရေနီ
နီမင်းကပြုံးပြုံးချေနှုတ်ဆက်လားခရေ
နောက်နီဆိုစွာ လာဖို့သိလတ်။

ဒေသံသရာတိကိုခြုံဖျက်ဖို့
ဗေဒင်ဆရာတိ နိစာဟောစတမ်းကို
ယတြာအခါခါချယ်ခကတ်ကေလေ့
ဝေသန္တရာအကြောင်းဆက်ရေဝက်ပါ
ဒေတခါထွက်ပေါက်ဟိပါဖို့သိလား။

မိတ်တွင်းတိအခါခါနက်ကတ်တေပွဲမာ
ဒေတခါလည်းသမိုင်းကြီးတင်ခပျာ။

သမိုင်းတိအခြံခံပျက်ခရေညမာ
ဝင်္ကံပါကြီးတိပြန်ဆပ်ဖို့
အမင်သားယောက်ျားပါအမင်။ ။

မေယု-မင်းကိုကျော်

ဒဏ်ရာခွဲတမ်း

ဗွိခံနီရေလောကခံအောက်မာ
ဆုပ်ကိုင်စရာအိပ်မက်တိ
အသက်ယှူချောင်လည်ဖို့
တသက်စာနှောင်တကို
အဖော်ပြုရဖို့လား။

ဘရဗွိသင်္ချာခတ်နီရေ ခံစားမှုတိကြားက
ဆန္ဒတိကိုအယွဲတိုက်လို့
မဲ့ပြုံးချေတချက်ပြုံးပြလိုက်မေ
တယောက်ထက်ဝက်စီရာ
ခွဲယူကတ်ဖို့နှန်း။

မျှော်လင့်ခြင်းကိုယ်စီနန့်
နှစ်ဘက်အချိုးတူစီခွဲယူခကတ်လို့
သုံဆယ့်လေးကြား ပါဒခြားလားရေခါ
ဘာသာဗေဒဆိုင်ရာ ဒေသနာထဲက
သဘာဝမဏ္ဍိုင်ထဲမှာ
ညီမျှခြင်းတိခြံခတ်ထားရေလတ်။

လက်နှစ်ဖက်ပေါင်း
ဆယ်ချောင်းဖြစ်တေခါ
ဘယ်ညာတချောင်းစီခြားဖို့ရက်တိကို
အပြုံးလွန်ပီတိဖုံးလွှမ်းလို့
သူ့ထက်ငါပိုရေထင်ခစွာမာ

အတိတ်မိရွက်ဝါသို့

အရွယ်မတိုင်ခင်ရွက်ဝါချေတိ
လီမာရွှင်ယုံလို့ မြိပြင်မာလူးတွန့်လို့ . .

ပျံဝဲခြင်းရသတပဲသားက
လူးတွန့်နီရေဝေဒနာကိုမိဖျောက်

လှပခြင်း
ပျော်ရွှင်ခြင်း
ရွတ်လပ်ခြင်း
ဝမ်းသာခြင်း
သာယာခြင်း
ခြင်း ခြင်း ခြင်း
ခြင်းရမ္မက်လောင်းရိပ်တိအောက်မာ
စည်းပျက် ကမ်းပျက် ဘဝပျက်။

အခြံခံတိစီးရာလမ်းက
လိုအပ်ခြင်းမာအစတည်ရေလတ်။

သွီးနန်းရွှီးရေမော်ကွန်းတိ

ပြက္ခဒိန်ထဲက သမိုင်းစာမျက်နှာမှာ
နှစ် ၂၃၁ ဆိုစွာ အခိုက်အတန့်တခုရာလား

သမိုင်းပြုလို့ သွီးငိုကတ်တေနိတိမာ
အဘာသားသမီးတိ ပဋ္ဌာမြီလူးခရရေ။

သွီးစိုစိုနန်းစီးကျခရေမျက်ရည်
အဘာမော်ကွန်း ကျောက်ထက်အက္ခရာထဲ
မှတ်တမ်းလေ့ ဝင်နီခယာ အဘာ။

ရက်စက်တေ နယ်ချဲ့မြှားဆိပ်တိ
ပြည်သူကို ဗဟိုပြုခကတ်တေအခါ
ရီပြင်ထက်မှာ စုံဆန်မျိုးလို့
နာမည်ခံမျိုးချစ်တိရှက်တတ်ဖို့
ခက်ထန်ရေစစ်ဖိနပ်တရံအောက်မှာ
ငါရို့တိဘဝက သမိုင်းကို သွီးနန်းရွှီးခကတ်ရရေ။

အိပ်မက်ဆန်ရေ ဇာတ်ဝင်ခန်းတိ
ရုပ်ရှင်ဗွီဒီယိုထဲကပိုင် အလွမ်းဇာတ်ခြင်းဖို့
အဘာသားကြီးဘဝ ရုပ်ထွက်မလှပခပါ အဘာ။

တစပြင်နန့် အဘာရင်ခွင်အတွက်
သမိုင်းကြီးဆပ်ဖို့ဘဝတီ
ရုပ်နာမ်မပြုပျက်ရအောင်
လယ်ကွင်းထဲက ကင်းစွန်းရွက်ခရုချေတီလေ့
ငါရို့တီဘဝကို
တိန်းတိန်းချေ ပါရမီဖြည့်ပီးခရရေ။

မလုံတလုံ ပဒရီခြံရုံနန့်
တိုက်ပွဲမမြင်ဖူးရေ
အိမ်နီထမင်းစားအမျိုးချစ်တီပြောရေပိုင်
ကြောဝါဝါနန့် တခါပြောကြည့်မေ

ရဲဖော်ရို့ . .
ငါရို့တီမာ ယိုစိမ့်နီရေသမိုင်းပေါက်ကို
သွီးနန့်ပီးဆပ်ခရရေ

ပြုပျက်နီရေသမိုင်းလမ်းကို
သွီးနန့်ခင်းခကတ်ရရေ

ရဲဖော်ရို့ . .
ငါရို့ခင်းရေသွီးမျက်ရည်တီ
သမိုင်းမှတ်တိုင်ထဲ အသာချေစီးလို့လာနီရေ

ဝိပဿနာသုတ်

ရဲဖော်ရို့ . .

သမိုင်းဝိးတာဝန်ကျိပွန်ဖို့
ယုံကြည်ချက်ကိုယ်စီနန့် ဘဝကိုရင်းပနာ
တိုင်းပြည်ကိုတည်ဆောက်ကတ်ရဖို့

ရဲဖော်ရို့ . .

ကျွန်ပြုခံဝင်ကြီးတိကိုခြံဖျက်ဖို့
မဝီးလွန်းရေအနာဂါတ်အတွက်
အားတင်းလို့ဆက်လျှောက်ကတ်ရဖို့
အားတင်းလို့ ဆက်လျှောက်ကတ်မေ။ ။

မေယု-မင်းကိုကျော်

၄။ တာဝန်သိရေလူက
တာဝန်ဟိစ္စာ အမှန်တရား
အလကားသီလားဖို့ အသက်
သမိုင်းသစ်တကွက် ရွီးနှိုင်းခကေ
အဖပြည်အတွက် ငါရေ သမိုင်းသစ်နန်းလူ။

၅။ အယှုံးကို အနိုင် အမှားကိုအမှန် ကျွန်ကိုသခင်
ပြောင်းပြန်လှန်ပစ်ချင်ရေစိတ်က
တော်လှန်ရေး အစစ်ဖြစ်တေ။

၆။ မလုပ်နိုင်သိရေ ကာလ
မတတ်နိုင်သိရေ အချိန်မာ
တော်လှန်ရေးဝမ်းစာဖြည့်
သမိုင်းကို မျှော်ကြည့်ယင်း
မျှော်လင့်ချက်တောင်ကုန်းမာ
နီစုန်းစုန်းဝင်လီပတ်စီ
တော်လှန်ရေးပန်းပင်ပျိုးစိတ်ဓာတ်ကို တန်ဖိုးမြင့်ယင်း။

၇။ မျှော်မှန်းချက်နန်းအသက်ဆက်
လူသားတယောက်အတွက်က
နီရက်တိုင်းသမိုင်းစာမျက်နှာ သံသရာကိုမမှန်း
ဒေဘဝဖြတ်သန်းလာရာလမ်းမာ
လိုချင်ဆုံးအရာတခုက ပြည်ရခိုင်ရွတ်လပ်ရေး။

၈။ ရင်ဘတ်ချင်း ပါးရေလူတိ
 သီဖော်ညှိပနာရွှီးနီကတ်တေ အဖပြည်သမိုင်းသစ်ထဲ
 ရွှီးယင်းနန့် သွီးတိတ်လားခရေ
 တော်လှန်ရေးသစ်ပင်ချေတိ
 ရွှီးယင်းနန့် သွီးခမ်းလားခရေ
 တော်လှန်ရေး တောင်တန်းကြီးတိ
 အမှန် နှမြိုးတသမိရေ။

၉။ တော်လှန်ရေးစစ်စစ်နန့်
 သမိုင်းသစ်ရွှီးနီရေလူအဖို့
 မျှော်လင်းခြင်းတောင်ကုန်းထက်
 နီလုံးတခါထွက်လာလိမေ
 ငါရွှီးရေသမိုင်းလေ့ မှတ်တမ်းတခါတွင်လိမေ
 ငါရေ ရခိုင်သားတယောက်။ IIII

ဆရာကျော်

ဒုတိယနတ်သမီး

ရင်ခွင်မြစ်ကျိုးအင်းကို
ကြယ်တစင်း ကြွီကျခိုက်
တိတ်ဆိတ်ရင်ခုန်သံရို့
တခါပြန်လို့အသက်ဝင်
ရှင်သန်ခြင်းကို ကျေးဇူးတင်မိယဉ်။

အီကွေတာ ရပ်ဝန်းက
ကန္တာရနုလုံးသားရေ
ဝင်ရိုးစွန်းဖြစ်ခွင့်ရရေအတွက်
နဂါးငွေ့တန်းကို ကျေးဇူးတင်ဖြစ်တေ။

ပင်လယ်နန်းကောင်းခင်ပြာရို့
မြတ်နိုးပေါင်းဆုံရာအရပ်
ယာဉ်စွန်းတန်း ဆုံမှတ်တခုက
ငါ့ရင်ဘတ်ကိုလှုပ်နှိုး
ငါ့ဥယျာဉ်ကို ပန်းပျိုးပီးရေလက်တစ်စုံ။

အရောင်စုံ ဒေသဥယျာဉ်ထဲက
အာဒမ်၏ဒုတိယ နံရိုးတချောင်း
ဘုရားသခင် ကောင်းချီးပီးခြင်းနန်းအတူ
ကောင်းခင်ဘုံကိုအတူလှမ်းခွင့်အတွက်
အိပ်မက်သစ် မြင်မက်ယင်း။ ။

ဆရာကျော်(၂၆-၉-၁၅)

ပြာသို(December)

ပြာသို
ခွာညို မွီးချင်မွီးလိမေ
နွယ်ချိုဖိုးခေါင်မာ
နှင်းမိုးရွာချင် ရွာလိမေ
ကစ္ဆပမြစ်ကမ်းမာ
မြူတိဆိုင်းချင် ဆိုင်းလိမေ
မသီချာပါ ပြာသို။

ရင်နာစရာအတိတ်
မိန့်ပစ်နှိုင်းအားမဲ့သူ
ပူလောင်ရေရင်ထဲက
ခံပြင်းနာကြီးရခြင်းရို့
အကင်းမသီလီရေခါ
ပြာသိုရောက်တိုင်း
မျက်ဝန်းရို့ညို
သွီးမျက်ရည်ယိုရမြဲပါ ပြာသို။

ပြာသိုမာ
သမ္မတရာဇာကို လွမ်းရေ
မင်းဗာဘုရင်ကို လွမ်းရေ
မင်းစောမွန်ကို လွမ်းရေ
နှစ်ပေါင်းငါးထောင်ကျော်လွန်ခ
ရက္ခိတထီးနန်းကိုလွမ်းရေ ပြာသို။

ပြာသိုမာ

မင်းသားဟာရီကို မုန်းရေ
ငသံဒေကို မုန်းရေ
ငထွန်းစံကို မုန်းရေ
မောင်ဝိုင်းကို မုန်းရေ
မောင်ပေါကို မုန်းရေ
အာဏာသျှင်ကို မုန်းရေ
ကျွန်ဘဝက မရွတ်နိုင်သိရေ
ငါ့ကိုငါတောင်မုန်းရေ ပြာသို။

ပြာသို

နှင့် မြင်နိုင်လား
ဂေါင်းဖြတ်ခံထားရ ရေဘုရား
မီးတိုက်ခံထားရရေ ထီးနန်း
ဖြိုချခံထားရရေ စာတီ
အာရ်ယာန်နှလုံးသည်းပွတ်
ရက္ခိတရုံမြတ်မုနိကိုတောင်
ပြည်ရခိုင်က ဆွဲထုတ်
ယုတ်မာသူရို့လုပ်ရပ်တိ
ငါ မျက်ရည်ကျမိရေပြာသို။

ပြာသို . . .

နှင့် ကြားနိုင်လား
ရက္ခိတပြည်သားငိုကျီးသံ
လှုံချွန်ထိပ်ဖျားက
သွီးအလိမ့်လိမ့်ကျယင်း

&c။Aspk

စကားမတတ်သိရေ အပုချေရို့၏
သွီးပျက်ထမန်းငိုသံတိ
နှင့်သိရေပြာသို
ရက္ခိတကမ္ဘာပြိုပျက်ခရပျာ။

ငါ ငိုပါရစီ
နာကြင်နီရေ နှလုံးသား
အနီရောင်သွီးမျက်ရည်ကြားက
ငါ့အကြည့်မျက်ဝန်းထဲမာ
မီးတောက်ပြာပုံ
သွီးချောင်းအလောင်းပုံ
တစပြင်စစ်တလင်း
ရက်စက်ခြင်းကမ္ဘာ တခုက
ကူကယ်ရာမဲ့မျက်ဝန်းတိ
မျက်ရည်ပြည့်ဝှန်း
အကြောက်တရား မျက်ဝန်းတိ။

ပြာသို . . .
ခွာညို မွီးချင် မွီးလိမေ
နှယ်ချိုဖိုးခေါင်မာ
နှင်းမိုးရွာချင် ရွာလိမေ
မသီချာပါ
.....
.....
မသီချာပါ ပြာသို။ ။

ဂိမ်းအိုဗာ

သီမင်းပီးထားရေ လက်ဆောင်
 မဟော်ဂနီရောင် ညောင်ရွက်တရွက်
 ဘယ်ဖက်ရင်ဘတ်မာ့ဝှက်ထားရေ
 ကဝေပျို၏စည်းချက်တိုင်းမာ
 ဒရမ်မျက်နှာပြင်ထက်က အင်းဆက်အဖြစ်
 ရုပ်ပျက်ဆင်းပျက်ကြွေကျ
 သင်္ခါရဟိုမုန်းစီညွှန်းရာအရပ်ကို
 အချစ်လို့နာမည် တပ်လိုက်ယင့်။

&c။Asmk

မောဟနန္ဒဖျော်သောက်တေပစ္စုပ္ပန်
နဘေထပ်မမှန်ရေ အနာဂတ်ရို့
ကမ္ဘာပတ်လမ်းကြောင်းနန်းကီးညှိမရခါ
သက္ကရာဇ်အုတ်ခဲကျိုးမာ ရညှိအထပ်ထပ်နန်း
(ပန်းသီးတလုံးဝှက်ထားရေ)
ကျောက်စာဖတ်နတ်သမီးကို စောင့်ယင်း။

အရိုးပြိုင်းပြိုင်းပက္ခဒိန်ရို့
သံဝေဂပျို့အကြိမ်ကြိမ်ရွက်ဖတ်
အရောင်မညီဆံစရို့ လီမာရွင့်
အလွမ်းသင့်ကဝေမက
ရင်ဘတ်ကိုလာတူးဆွရေအခိုက်
သိုင်ခေါင်တိုင်မသိစိတ်
ကျောက်ဖြစ်ညောင်ရွက်
အဝှက်လွန်ပန်းသီးရို့၏ မိုးခေါင်လို့တီးရေဗုံသံက
လူဖန်ဆင်းခွင့်မရခရေ
အာဒမ်၏နံရိုးတချောင်းအတွက်။ ။

ဆရာကျော်

စုပေါင်းကာကွယ် အဖပြည်

(၁) ဝတီဓည ခေတ်ကသာယာ
ဘုရားပွင့်ဘိ မဇ္ဈိမမာ
စန္ဒာသူရိ ကြားသိရာဇာ
ပြည်တော်ရောက် ပင့်လျှောက်ဘဂဝါ။

(၂) ထိုအကြောင်းရင်း သိချင်းမှန်စွာ
(ရှင်)သျှင်တော်ဗုဒ္ဓ မြန်းကြလို့လာ
ကိုယ်စားမုနိ ထားဟိမလာ
အရောင်ဆင်း ထွန်းလင်းသာသနာ။

(၃) သေလာဂီရိ မည်ဟိကျောက်တော်
ခြံအစုံရပ် ကြောင်းဇာတ်မှန်းမျှော်
ဗျာဒိတ်ပီးခ များလှဓာတ်တော်
ပြည်တဝှမ်း ရှင်လန်းသာဓုခေါ်။

(၄) ကမ္ဘာတလွှား ထင်ရှားမြိုင်မြိုင်
စိုင်လာကြီးမား ဆန်းပြားရခိုင်
လူခေါ်သံကြား ဘုရားထူးပြိုင်
တုမဟိ မှတ်သိပြည်မဏ္ဍိုင်။

(၅) ရက္ခန္ဓာမိ လက်ဟိဂုဆို
သူများလက်အောက် ကျရောက်လို့ပြီ
ရာရာစစ နိမ့်ကျဝါးမျို
ကျွန်သက်တမ်း ရွတ်လမ်းမျှော်ဖို့လို။

(၆) အလေးမထား သောက်စားသေရည်
ကိုယ်ရို့ဘဝ နားကမလည်
လက်တွဲမလုပ် အဟုတ်ရွှီပြည်
ရွတ်မြောက်လမ်း အလှမ်းဝေးလိမ့်မည်။

(၇) ကိုယ့်အချင်းချင်း သွီးရင်းပိုင်ရာ
ချစ်ခင်မြတ်နိုး အမျိုးသီလာ
ပြည်မဏ္ဍိုင်ကြီး ငြိမ်းအိမ်ဖို့ရာ
ချိန်မနှောင်း စုပေါင်းကာကွယ်ပါ။ ။

နေမင်းခိုင် (ကျိန်းရိပ်)

သင်္ဃာတိပဋိပက္ခ (တေးထပ်)

ပင်ယံမာ ပဏာတင့်
ဂုဏ်မြင့်ရေ သင်္ဃာ
နန်းထိုက်လို့ တော်ဝင်
အညာဆင်ပွင့်ဖူး
ဆောင်းရာသီနှင်းဝီဝီနန့်
ခက်ဖြာစီ လှတမှုထူး။

တန်ဖိုးဟိ ပန်းမာလာ
ပျူငှါစွာ ဆွတ်ခူး
လူတကာ လွန်ယစ်မူးလည်း
မြီလူးဖို့ဝီးကွာ
ပန်းထိုက်သူ ပန်စီသား
မမှားတသက် သူ့သစ္စာ။

ခိုင်းနှိုင်းခ စိုင်လာ
တူညီစွာ သင်္ဃာပန်း
အသွင်ဆန်းရေ ရခိုင်သူ
စွဲမှတ်လို့ယူ။
လူမျိုးခြား အိမ်ထောင်ထူကေ
သင်္ဃာဖြူ မြီလူးလိမ့်လည်း။ ။

နေမင်းခိုင်(ကျိန်းရိပ်)

ရိုးမဥဒါန်း

လေးရပ်ဝတီ လေးနဒီနှင့်
မြူခြံရစ်ဆိုင်း ရိုးတံတိုင်းဟု
ကြည့်တိုင်းလှနီ လခြမ်းမြီက
အနီဝီးကွာ ရီကြိုင်ရာကို
ထွက်ခွါလာရ ရက္ခိတရို့
ဘဝနာကတ် စိတ်နာတတ်စီ
ပါးနပ်လိမ္မာ အောင်မြင်လာယောင်
ဖွီရှာကြိုးစား လုံ့လထားကတ်။

တနီနိမှာ အောင်မြင်လာကေ
ကိုယ့်ရွာကိုယ့်ရပ် ပြန်လာကတ်ပြီး
ကျွန်ဇာတ်ဘဝ ရောက်နီရရေ
သာစွဌာနီ လခြမ်းမြီကို
ချိန်မိတည်ဆောက် အလင်းရောက်ယောင်
တယောက်တအား စွမ်းပကားနှင့်
ဆီးသားလှလှ ချယ်ကတ်ရဖို့။

ဘဝမရိုင်း ရခိုင်တိုင်းမာ
သမိုင်းတာဝန် ဟိရိုးမှန်လို့
ဘေးရန်ခလုတ် အမျိုးယုတ်ကို
တိုက်ထုတ်ပနာ ပျော်ရွှင်စွာနှင့်
သာယာထွန်းတောက် ရိုးမအောက်မာ
တခေါက်တခါ ဆုံရပါစီ
တောင်းဆုခြံ၏
မကျီဥဒါန်း ရွတ်မြောက်လမ်း။ ။

နေမင်းခိုင်(ကျိန်းရိပ်စွ)

(၄) မေကြီးအိမ်ထောင်ကျရေနှိ
 ဘာဘာနန်းအမင် အာဟာရပြတ်လားစီရေ
 မိသားစုထဲမှာမှ အထွေးဆုံးအမင်ကို
 မင်းကြီး မင်းချေရို့လက်ထဲမှာ လိုတရခသရွိ
 ယင်းနိည တုန်ရီနီသောအမင့်နှုတ်ခမ်းစွာ
 ရင်မာဒေဂုတိုင် အသစ်ထင်းထင်းဟိပါသိရေ
 သျှစ်တောင်နက်တေရီကို
 ဗြဟ္မစိုရ်တရားအားကိုးနန်း ငါးပုပ်ငါးဆိုးနှစ်သိမ့်မှုရို့
 အာဟာရလင်းခါမာ
 လမုန်းပိုက်ကျွေးလာရေဘာဘာ
 သမီးခွန်ဆင်းလားရေ ရင်ဘတ်
 ဇာလောက် ဗန်ပျက်ကျန်ခလေး။

(၅) ပဆိုးတထည်နန်းတနှစ်ကျော်ကြာ
 ပျော်တော်စံခီရေကိုကြီး
 ပလက်ဖောင်းဂေါင်းအုံးဖူးမှ အိမ်ကိုပြန်တမ်းတရေ
 နဂါးမောက်ရွာမှာ အာသာပြီလောက်တေ နွီးထွီးမှုတိ
 မဟိလို့လားသားကြီးလတ်

ကန်ရီ မြက်ခြောက်သင်းရနံ့နန်း
 ဖြူစင်လွန်းရေ ကိုကြီးမျက်နှာစွာ
 မြို့ပြဒီဒိုင်နာ ကလပ်နံ့နံ့လာရေ

(ကိုကြီးမသိခဆုံးမာ)
 ကိုကြီးမဟိရေနိကပင်
 အမင်စွာ တညည့်လှေအိပ်မဝခပါ။

(၆) ပါးရာမာခြင်ထောင်ချာဇာထက် ပိုသလောက်
ဆန်ကောဇောက်လောက်မနက်တေ ကိုကြီးကို
ထူရေအကောင်လို့ အမင်အပြစ်မတင်ဝံ့ခရေပိုင်
မြီအိုးခပ် အီးရိပ်ရီတခွက်လောက်
မော်ဒန်မမြင့်ရေ အိမ်မိုးသတ္တဝါတိကို
ဘာဘာရင်ထဲက တစက္ကန့်ချေပင်ထုတ်မရခ။

(၇) ကောက်ရိုးရုံထဲမာ ညကခါအိပ်လို့ဟိလီသိရေ
မိုးလင်းပြီးမှ သားပျောက်ရာဇဝင်ကို
မပဋ္ဌာနန့်အမင် တယောက်တခန်းစီ
ဖျော်ဖြေလီကတ်တေ။

(၈) အဝတ်အစားကောင်းနန့်
ကချင်ပြည် ပိုစုံမော်ဒန်ရောဂါဝင်လားရေ အကျွန်ကို
နှုတ်ဆက်ချိန်ပင်မဟိခရေ အမင်
ဖုန်းထဲကမျက်ရည်စွာ ရှီကျင်းထဲမာပုံစုပ်
ဆယ်လုံးထိုးစတိုင်လ်နန့် အခြောက်ခံဖူးခပါရေ။

အကျွန်ချစ်တေ အမင်စွာ
ရဟန်းမိဖြစ်ချင်ဇော ရုပ်လုံးပေါ်နီစွာသိယင့်နန့်
ကိုယ်အရွံဆုံးလူက ကိုယ်ဖြစ်ခပါရေ အမင်
ယင်းကြားထဲ ယှိုက်စပီးယားကို အားကျပုံမာ
ပုစွန်ချေတကောင်ပင် ဖုတ်မကျက်တေမျက်နှာက
အမင်မိုးရကျိုးမနပ်လိုက်တေ။

(၉) ဒေဂုဆိုပါကေ မိသားစုဗိမာန်စွာ
တောင်ဆုတ်နက်တေ ထမင်းအိုးမာ
တထွင်းရာချေကုန်တိုင်း
ဘာဘာ ဇာအဘိဓမ္မာကို ဖွင့်ဖတ်လိမ္မ့်ဆိုစွာ
အကျွန် အာဂုံရထားရေ။

(၁၀) ခမောင်းတောကုန်းတန်းက ဘာဘာဝေဒနာတိ
ထုတ်မလှန်းပဲ အသို့လွန်ပြန်ရေ
ဇရာမိတ်ဆုံ လွယ်ချက် လွယ်ခက်
ဘု'ဘ' ပြည့်စုံနိုင်လိုက်တေ ဆိုစွာမာ
တောင်လီပြင်းလီ အရီခွာဖို့ ပိုသတိရလီ
ဘာဘာဘဝနန့်တော့ခါ
ဒုက္ခရာသီထဲမာ တသားမိုး တသွီးလှ
ဝတ္တရားမြို့တော်ကို တွားတက်နီလီဖို့သိ။

ဗြီးမကြည့်ဘဲ တွေးကြည့်လို့ သိပါရေ
(အဟံ ဝန္တာမိပါ ပိတာ)

ဘာဘာချစ်တေသား အဓိပတိဖွားချေမာ
ရွက်ကျပင်ပေါက်အနာဂတ်ကို
အဝဇာတပီပီ ဒါဒေါင်လေ့မပီးနှိုင်းခါ
ပတ္တမြားမစစ်တစစ် ညွန်(နွံ)နစ်လေ့မခံနှိုင်းလို့ပါ
ဘာဘာနန့်အမင် ခွင့်ရွတ်ပီးကတ်ပါလီ။ ။

ခိုင်မျိုးသန့် (နဂါးမောက်)
မှင်မဟုတ်တေ ရင်နန့်ဖွဲ့စပ်ဖူးသော ပဌမပါဒ။။။။

ဆီတစက်နန့် ရီတခွက် ကဝိပီဇနုလုံးသား

(အကျွန် ရှင်သန်ခြင်းအဓိပ္ပာယ်ထဲမှာ)

ဒီဇိုင်နာ

အထည်ခြုပ်စက်ရုံတိ ပိတ်လားဖို့ထက်

သုံးရာတန်

အမင့်ကမ္မလာ စုတ်လားဖို့ကို ပို့ကြောက်တေအကောင်ပါ။

ဥတု သဘာဝ ဝိပရိဏာတသင့်လျော်စွာ

ဝါခေါင်

အာခေါင်ခြောက်ကပ်နီလီဖို့ထက်

ဘာဘာ

အဖန်ရည်မသောက်ရသိရေနိတိကို ပို့မခံစားနိုင်။

နက်ဖြန်ခါခိုလှုံခွင့်ကီးကို နင်းကြည့်ကေ

လောကကြီး ဆာဟာရအိုင်အိုင်ဒင်းပြည့်ဖို့ထက်

မိသားစု

ကျမ္မာရေးမပြိုကွဲဖို့ကို ပို့တွက်တေ။

ကမ္ဘာနှင့်အားပြိုင် တယောထိုင်ထိုးနီသော
အိတလီ အိုစီ ကိုရီးယား နိုဝေ
ဂျော်ဒန် အမေရိကန် ဖင်လန် လန်ဒန် နိုင်ငံရို့
စီးပွားရေး လူမှုရေး နိုင်ငံရေး
ပညာရေးတက္ကသိုလ်အဆင့်မြင့်စွာ အကျွန်နုနုမဆိုင်။

အကျွန်နုနုဆိုင်စွာ
အာရက္ခသားအိမ်မာ
မိဘမဲ့ဂေဟာကအချေတိ သင်ပုန်းကျောက်တံနုနု
ထမင်းနပ်မှန်ဖို့က အကျွန်နုနုဆိုင်ရေ။

ယေနုနုဆိုပါကေ အမင်
အကျွန်နုဘဝဟိရေ ပစ္စုပ္ပန်စွာခါးပတ်စီ
ကဗျာဟိကေ အကျွန်ပျော်ပါရေ။

အာရုံပြန့်လို့ စိတ်ရွတ်ရွတ်နီသော
လရောင်တန်းဒေသ တဝှမ်းမာ
တထပ်ချင်းကွာကျခရေ ငယ်ဘဝကြယ်ကြွေတိကို
အာကာမာ ပြန်ချိတ်ဆွဲယင်း
ကဗျာဟိရာမာမှ ပျော်တတ်လားပါယာ အမင်။ ။

ခိုင်မျိုးသန့် (နဂါးမောက်)

ပစ္စုပ္ပန်ထဲကျွန်တို့နီသော လိုင်စီအက်သံအကြောင်း

ချစ်သူ . . .
မင်း ယုံကြည်ရာကို တုပ်ချိုင်ထားဖို့
အတွင်းသား အနာဂတ်တရွားမာ CCtV တပ်ပီးမေ။

ငါ့ကိုလွမ်းတိုင်း စိတ်နာဖို့မမိပါကေ့
Phone Bill ခမ်းမှ ငါ့ကိုသတိရပါ
ဒေအကောင်ကို ဂြိုဟ်ဆိုးအဖြစ် နှလုံးသွင်းပီးပါ။

အညံ့စား လက္ခဏာအကြောင်းကို
မင်းဒိုင်ယာရီမာ ဖွင့်မဖတ်ပါကေ့
သူ့ပါးပြင် မိုးဥတုဖြစ်နီသောအကြောင်း
သက္ကရာဇ်စွာ ဒါသီကျကျိန်စာသင့်နီသောအကြောင်း
လုံးဝ လုံးဝမတွေ့ပါကေ့ချစ်သူ။

‘တနေ့တော့ကိုယ်ပြန်လာမှာ ဘဝရေးမို့ ခဏလေးဝေးလို့
နေရတာဟာ ကိုယ့်ငယ်ကျွမ်းဆွေပါ’
အစကပင်သိခကေ နားပင်းကွန်ဆောင်ထားလိုက်ဖို့။

မေသေမှန်းမသိရေ ဝေဒနာတီ
New Style နန့်တောင်ကျရီ နှုတ်ခွမ်းဖျားကိုသက်ဆင်း
ဘွင်းဆို စုတ်ပြတ်သတ်နီရေ အနမ်းခါးစွာ
ရင်ကိုလောင်ကျွမ်းဖို့ ဖူး ပွင့်ပါလတ်တေ။

ဝိပဿနာသုတ်

အာသီသ တပုံကိုထမ်းဗျာယ် မျက်ရည်ပါရေ မျက်ရည်
 အောင်မင်္ဂလာဂိတ်မာ ပေါက်ဈေးနန့် ချရောင်းပစ်လိုက်တေ
 မဇ္ဈိမတာရာတခင်း အင်္ဂါရပ်ကွက်ထဲ လဲကျ
 ဘောင်မဲ့ သောကလမ်းဆုံက တခန်းရပ်ကကွက်ကို
 မလေးသျှားဖလပ်တန်းမာ ခွဲစိပ်ကုသပစ်လိုက်ဖို့
 ကိုယ့်အန်ဖက်ကို ကိုယ်မရွံ့နိုင်
 ဖယ် ချစ်သူ
 ငါ့ဘဝ ငါဆီးမေ။

(ချွေးစက်လူးလူးနန့်ထမင်းတလုတ် လိပ်ပြာသန့်ချင်လို့ရာ)

အို ဇာယောင်ယောင်နန့်
 ရက်ပေါင်းတထောင်ကျော်ကို ခလုံးသတ်ပစ်လိုက်ယာနှုန်း။
 မငိုပါကေ့ ချစ်သူ . . .
 အမင့်အတွက် ပုဝါတပိုင်း အလျင်ခင်းပီးလိုက်ပါမေ
 ပြီးမှ မင်းပြုံးပြပါ။ ။

ခိုင်မျိုးသန့် (နဂါးမောက်)

ကနဏ္ဍိယ အပုပ်
လူမိုက်မာ အယှုပ်
မင်းသားမာ အရုပ်
ငါးမာ ငရုပ်
ပန်းချီမာ စုပ်။

ယောက်ျားမာ ရင်
မိမမာ တင်
ပန်းမာ သင်
ဂေါင်းမာ ဆံပင်
နန်းမာ ဘုရင်
ဗူးမာ စင်။

ငါးတန်မာ ဝမ်း
ငါးခူမာ နှုတ်ခွမ်း
ကိုရင်မာ သင်္ကန်း
ခုံရုံးမာ ကျမ်း။

ဟင်းမာ ငပိ
သူတော်မာ ပသိ

အရက်မာ တော
မုန့်တီမာ အမြိုး
နောက်ကျကေ အောက်ကျရေ
လင်းတမာ အရိုး
လူမာ အိုး။

စည်းလုံးကတ်ဖို့

ရိမြိဒေသ ဝိးက္ခာရလို့
ဌာနမတူ လီယူလီသိမ်း
ပဇာင်ယိမ်းလေ့ မစိမ်းမကား
ကိုယ့်သွီးသားပိုင် စိတ်ထားညီတူ
လက်တွဲကူကေ အဝေရခိုင် သတင်းကြိုင်ဖို့။

ယင်းသို့မဟုတ် စိတ်ထားပုပ်နန့်
အဟုတ်ခွဲခြား မင်းကားတောင်ပိုင်း
ငါမြောက်ပိုင်းဟု ရိုင်းစိုင်းဉာဏ်နည်း
သွီးကိုခွဲကေ အဝေရခိုင် သတင်းမှိုင်ဖို့။

ရခိုင်ဆိုစွာ ဇာမာနီနီ
ဇာရီသောက်သောက် ဇာလောက်ဆိုးဆိုး
အမျိုးဆိုကေ ချစ်ကတ်တေလို့
ငါရိုရိုက ပြောခကတ်စွာ
ကျောက်စာဟိယင့် ကြည့်ပလင့်။

မသင့်မမြတ် ယင်းစိတ်ဓာတ်ကို
ဝဲသတ်ပနာ ဂုခါကစ
မျိုးဂုဏ်လှဖို့ ငါရို့စည်းလုံး
အားကုန်ရုန်းယင်း ဆုံးယှုံးခရေ
အဖပြည်တွက် နှိုင်းရေဖက်က
ကျရာတာဝန် ကျီပွန်းအောင်ထမ်း
ရိုသို့လှမ်းမေ လူရို့လေ . . . ။ ။

ဖြိုးနိုင်ထွန်း (ငွေဆောင်-သင်)

ရခိုင်

ခြောက်လေ့မကြောက် ဟောက်လေ့မလန့်
 ခန့်ခန့်ညားညား ကျားလျားမောင်းသန်
 မြန်ဆန်သွက်လက် ထက်မြက်ဥာဏ
 ဇသွီးမငယ် နယ်ပယ်မကျော်
 မော်ကြားမဟိ ထိကေမခံ
 မှန်ကန်စိတ်ဓာတ် မြတ်တေအမျိုး
 ကိုးလီဗုဒ္ဓါ စာပီကိုယ်ပိုင်
 ခိုင်မာစကား ပါးဝီးမခွဲ
 လဲလူကူထူ ဖြူစင်ကျော်ဟိုး
 ဂုဏ်တန်ခိုးနန့် အမျိုးသီလ
 နှစ်ဌာနကို ပြည့်ဝပိုင်ပိုင်
 စောင့်ရှောက်နှိုင်း၍ ရခိုင်ဟုလူ
 ဒေဇမ္ဗူမာ တူသူမဟိ မှတ်ယူဖို့။ ။

ဖြိုးနိုင်ထွန်း (ငွေဆောင်-သင်)

အာသျှ နီဝန်း

မျိုးရိုးပီဇာ အာရက္ခကား
အောက်ကျမခံ ဇာတိမာန်နန့်
တွန်းလှန်တိုက်ခိုက် လှူငှါမိုက်သား
ရက္ခိက်ဘီလူး မိစ္ဆာရူးကို
ဦးညွှန်ချိုးလှန် အာရ်ကန်တည်း။

ပူရံပြည်ရွာ ဒေသနာနန့်
စာပီစကား အမျိုးသားရို့
တပါးလက်အောက် ဝပ်စင်းရောက်၍
အကြောက်တရား စိုးထားမင်းမူ
ရန်ဟူသမျှ သီကြီရရေ
ကာလအပျက် ယင်းနီရက်မာ
ထွက်လာပေါ်ထွန်း သျှင်နီဝန်းကား
ကိန်းခန်းကြီးမား ဘုရင့်ပါးသို့
ထွက်လားစာခွေ စေရွတ်ပို့သ
ရဲသွီးပြသူ အာဂလူတည်း။

သြဇာတိက္ကမ ကြီးမားလှ၍
 ဒေါသကြမ်းတမ်း လောဘလွမ်းသူ
 ထီးနန်းပိုင်စိုး ဘုရင်မျိုးဟု
 တန်ခိုးအာဏာ သံကွန်ခြာ၏
 မဟာအမုက် ချောင်းချောင်းထွက်၍
 ညက်ညက်ချေမှုန်း မဆုံးနှိတ်စက်
 ဖျက်စီးသုတ်သင် တမင်ညှဉ်းပန်း
 ရက်စက်ကြမ်း၍ မစွမ်းခုခံ
 အားမတန်ကာ မာန်လျော့နွမ်းလျှ
 လက်ပန်းကျလျက် ဘဝနတ်ထံ
 ပျံလွန်တော်မူ အနားယူသည့်
 လူရို့အခေါင် ပြည့်ဥသျှောင်သည်
 အမှောင်ဖုံးအုပ် ဇာတိမြုပ်၍
 သိမ်နုတ်ကြောက်ရွံ့ တွန့်ဆုတ်တွေဝေ
 ပေတေလီရွင့် မပွင့်အာရုံ
 ထိုင်းမှိုင်းသုန်ကာ မှုန်ရီဝီဝါး
 ပြည်သူသားကို တရားသောစစ်
 ထိုးကျန်ရစ်အောင် လှစ်ဟဖွင့်ပီး
 ရှိဆောင်ပြီးသော ကြောက်သွီးကင်းပ
 လမ်းဖွင့်ပြသူ အာသူသူရဲ
 ယှားမီးခဲတည်း။ ။

ဖြိုးနိုင်ထွန်း (ငွေဆောင်-သခင်)

CKHWM F

ဣဇာဖိုးဖိုး အသက်သွီးနှင့်
 ပီးဆပ်ဆောက်တည် ဂုဏ်ရောင်ဝီသို့
 စာပီခိုင်းနှိုင်း ရခိုင်တိုင်း၏
 သမိုင်းသက်သီ မပျက်စီဖို့
 သာကီမျိုးဆက် ငါရို့လက်နှင့်
 ဂုထက်တပြန် အဖိုးတန်အောင်
 ဝန်းရံဖွဲ့နွဲ့ ဆီးသားထည့်လို့
 ပွန်းပဲ့မခံ အဓိဋ္ဌာန်ပနာ
 အားမာန်စိုက်ထူ လက်ဆတူကေ
 နောက်လူမျိုးဆက် သူရို့လက်မှာ
 ကျောက်ထက်အက္ခရာ ဂုထက်သာအောင်
 ညီညာရိုင်းပင်း တတူခင်းဖို့
 ယင်းအတွက်နှင့် နောက်တက်မျိုးနွယ်
 ကမ္ဘာ့လယ်မှာ ဝင့်ထည်တောက်ကြား
 သတင်းထွားဖို့ တောင်သားမြောက်သား
 ဘေးဖယ်ထားလို့ စကားချိုချို
 ပြိုင်တူဆိုယင်း အစ်ကိုနှင့်ညီ
 စည်းလုံးနီကြောင်း
 ရိမြီမခွဲ သွီးမကွဲကြောင်း
 အနည်းအများ စိတ်မထားကြောင်း
 လေးစားအားကျ ဖြစ်စီရဖို့
 လမ်းပြထုဆစ် အမျိုးချစ်သို့
 နှစ်ဝနတ်လူ ချစ်ကြည်ဖြူသည့်
 ခိုင်သူခိုင်သား ရက္ခဖွားရို့
 နိုးကြားညီတူ တာဝန်ယူကတ်။ ။

(၅၁၀-၅၀၀) နှစ်အထိ
 ပြီးခွင့်ထွန်း (၅၀၀)

သွီးစည်းကတ်မေငါရီရခိုင်

ကမ္ဘာဦးသမိုင်းကို
ဇာသုတယောက်မပြောနိုင်ကေလေ့
ဒေမြီသမိုင်းမာ ရက္ခိတရီဒြီဦးချ
ဝါသုဒေဝ ဗလဒေဝရီဒြါရာဝတီမာ စိုးစံခလီရေ။

အာကာလေတူ ရီမြီလေတူ
မျိုးပင်လေတူ မျိုးညှာလေတူ
သွီးသားချင်းလေတူ သမိုင်းတခုလေတူ
နှလုံးသားချင့်လေတူ နာလေတူသာလေတူ
ရခိုင်သမိုင်းကိုပက်ခုံးခံလို့
ငရီအတူတူချီပိုးလာခကတ်တေ။

ထော ရခိုင်အင်ပါယာတခုပြိုကွဲ
မရဏသီမင်းတိငရီအမျိုးကိုဓားကဇတ်
ငရီမြီကိုခွဲခြမ်း
ငရီတိဘဝကိုလမ်းခင်းလိုက်စွာ
အေဂုထိလေ့ စည်းရခက်နီခရေ။

ထော တောင်ကုတ်ကိုလားခရေအဘာကို
ညကခါ ငါဖုန်းခေါ်ကြည့်ရေ
(ရခိုင်ကလူတိ ပြန်ခယာလတ်)
ငါရင်မာဆို့လို့
လခြမ်းလေ့တစိပ်ပဲ့လားရေပိုင်တို့ရေ
သူရီရခိုင်ဘွဲ့ကိုခံမို့တွေဝေနီရေ
ငရီကိုရခိုင်လတ်။

အေချင့်ဇာတိုင်းပြည်

အဘာ

အာနန္ဒာစန္ဒြေကျောက်စာလေ့မြင်ရေ
ဘုရားပုထိုးတိရိစ္ဆာန်တက်ကျိုးပဲ့နီရေ
အုတ်ထရံနံ့ကုန်းမြင့်တခုလေ့ဟိရေ
မြို့ဟောင်းလို့လေးခေါ်ကတ်တေ
အေချင့်ဇာတိုင်းပြည်ခေါ်လေးအဘာ။

အဘာ

စပါးခင်းတိမြင်မဆုံးဟိရေ
ထမင်းတောင်းစားနီရေအပူချေတိကိုလေ့မြင်ရရေ
ဓညဝတီလို့လေ့ခေါ်ကတ်တေ
အေချင့်ဇာတိုင်းပြည်ခေါ်လေးအဘာ။

အဘာ

စောပြည့်ညို၏အလွမ်းရတုကိုလေ့မြင်ရေ
သုခမိန့်ရို့၏လျှောက်ထုံး ဖြတ်ထုံးတိကိုလေ့မြင်ရရေ
စာပီပေါ်ရေကာလလေ့စောရေလို့ဆိုရေ
ရွာတပတ်လက်မှတ်ကောက်ခါ
နာမည်မရိုးတတ်တေလူတိအများကြီးတွံ့ရေ
အေယုဒ်ဇာတိုင်းပြည်ခေါ်လေးအဘာ။

အဘာ

ဘင်္ဂါဆယ့်နှစ်မြို့ကိုပိုင်စိုးခရေလို့ပြောရေ
လုပ်သားမဟိလို့ခေါ်တောတစုကို
အငှားခေါ်ရေလို့လေ့ဆိုရေ
ငါရို့မြို့ကိုပိုင်သျှင်ခံ
ငါရို့တိကိုလေ့ လိုင်လှီးလို့မြင်ရေ
အနောက်တန်းခါးလို့လေးပြောဆိုကတ်တေ
အေချင့်ဇာတိုင်းပြည်ခေါ်လေးအဘာ။

အဘာ

အရိုဖက်မာရောဝတီ
အနောက်ဖက်မာဘင်္ဂါဆယ့်နှစ်မြို့
တောင်ဖက်မာဟိုင်းကြီးကျွန်း မော်တင်စွန်း
မြောက်ဖက်မာအာသံ ထရိုပူရအထိ
ငါရို့ပြည် ကျယ်ဝန်းရေလို့သိရရေ
လခြမ်းမြို့လို့လေ့ခေါ်ဆိုကတ်တေ
အေချင့်ဇာတိုင်းပြည်ခေါ်လေးအဘာ။

အဘာ

အာသျှအကြီးဆုံးဂတ်(စ်)ပိုက်လိုင်းဟိရေလေ့မြင်ရေ
ဖယောင်းတိုင်ဝယ်ဖို့ဆန်တဗူးနန့်
ဆိုင်လားစွာကိုလေ့မြင်ရရေ
ရိုးမနောက်ကဆိုက်ဘေးရီးယားငှက်တိ
အရွှီလိုက်အအုပ်လိုက်ထွက်ခွာပျံသန်းနီရေ
ရတနာရွှီမြို့လို့လေ့ခေါ်ဆိုကတ်တေ
အေချင့်ဇာတိုင်းပြည်ခေါ်လေးအဘာ။

ဝံလက်ဖျိမြို့သူလူပုဂ္ဂိုလ်

အဘာမျက်နှာကိုတချက်ကြည့်ခါ
အဘာရင်ဝမာဆိုလို့ပြောမထွက်ဖြစ်နီရေ
'တောက်' တချိန်းခေါက်လို့အားတင်းပြောလိုက်တေ
ဝေးငှါသား . . .
အေယုဒ်ကို မင်းမဟိတိုင်းပြည်လို့ခေါ်ရေဝေး။

ခိုင်စံအောင်

ရွက်စိမ်းကြီးသံ

တဖြောက်ဖြောက်နန့်ကြွီကျသံတိ
 ရာသီစက်ရဟတ်တပတ်ပြည့်တိုင်း
 ဒေကြွီကျသံ မြီခသံတိလေ
 ရိုးမရင်ခွင်မာပဲ့တင်ထပ်လို့
 ဝတီသားရင်မာဘောင်ဘင်သတ်လို့
 ရက္ခိတရို့အသွီးသားမာ
 ဇာတိမာန်တရားနန့်
 သူရဲကောင်းဝိညာဉ်တိပူးကပ်နီလီရေ။

သဘာဝဇာ နိယာမအောက်မာ
 အညာအိုဟောင်းလို့သူရို့ကြွီကျလီခြင်းမဟုတ်
 ရာဟုဖမ်းထားရေအာကာအောက်က
 မှန်အိမ်ပျက်ကိုလက်မာဆုပ်လို့
 မင်းမူလို့မြူးကြွနီရေမိစ္ဆာတိကိုသုတ်သင်ယင်း
 ကျွန်သမုတ်ကိုထုံးဖြူသုတ်ယင်း
 လီဗွီလီရိုင်းရို့အောက်မာ
 သွီးစက်သွီးပေါက်တိနန့်ကဗွည်းထူလို့
 အစိမ်းခြောက်ခြောက်ကြွီကျရောက်ခရေ။

နီဝင်ဘာ(၁၉)
 ရခိုင်အာကာမာကြယ်နီသျှစ်လုံးရို့၊
 တပြိုင်တည်းနန်းကြွပြုန်းလို့မြီခကတ်ရရေ
 မျက်ရည်အိုင်ထွန်းဖြစ်ရရေ
 အလေးပြုလို့ဂါရဝလုပ်တေ
 ကလိန်ကကျစ်နန်းဘဘီမသတ္တိကိုထဘိန်ဝတ်ခိုင်းလို့
 သူရဘွဲ့ဆောင်းစွာမရှက်ကတ်လားမိန်းလိုက်ချင်ရေ။

ငရို့တိနားမာ ဒေတဖြောက်ဖြောက်ကြွသံတိ
 ဝမ်းနည်းရရေနီရက်ချေတိ
 ငါသတိထားမိရေ
 ရာဇထီးဖြူဆိတ်သုဉ်းလားရေကားချပ်နောက်မာ
 ဒေကြွသံတိကိုအမြဲမပြတ်ကြားလာရရေ
 အမြဲမပြတ်ဝမ်းနည်းရရေ
 အမြဲမပြတ်ကြားနီရလိမေ
 ဒေရာဇထီးဖြူမဆောင်းသရွှိလေ . . . ။ ။

ခိုင်စံအောင်

ခြောက်နှစ်သား

နိက္ခာရထဲမှာ
အာခြောက်နီရေ ရက္ခိတရီအတွက်
ကျောက်စက်ရီတစက်ချေရဖို့
ဥတုတိကိုဖောက်လာရစွာ
အာယုကီလို့ချိန်ခွင့်တောင်မရနိုင်ပါသိ။

၁၁၄၆ ပုဂံဂြိုဟ်သားရီ၏
အလင်းဖျောက်ခံထားရရေ
အဇ္ဇအဇာရီလက်ဗွီရာကို
သူကိုယ်တိုင်ထုဆစ်ဖို့လတ်။

ဒီစမ်ဘာနောက်ဆုံးညမှာ
ရက္ခိတရီအတွက်
ဆောင်းရာသီ၏ အပူဒဏ်ကို
နှင်းသောက်ပန်းချေတီအတွက်
ဇာရာသီနန်းအစားထိုးဖို့လေးယေ။

ဒေဂုကြည့်လိုက်ဖိ
ပြဿဒါးမရွတ်ခရေ နှင်းရိုင်းညမှာ
ဥဩရီသောက်ဆင်းခရေနီကို
မြို့ဟောင်းမြို့မှာ သူဘာသာပြန်ဖို့လတ်။ ။

နောင်းရိုး (Aryan)

အလင်းကြွမြို့

ဖေဖော်ဝါရီဂြိုဟ်ထဲက
ဗီးနပ်(စ်)စံချိန်တင်ထားခရေ တလင်းဂနီရက်ကို
နားလည်မှုမိတ္တူအဖြစ်
အမှန်က ငါရဲ့ဆွဲခသင့်ရေ။

မိုးရိပ်ဖွဲ့ကောင်းခင်၏
အလင်းမဲ့ ညည့်ကိုငါထွက်ကြည့်လိုက်တေ
လက ဗလာ ကြယ်ကနူ နန့်
ငါ့အိပ်မက်တိလေ့ ချွေးစွတ်စွတ်နန့်ထော
အဂင့်ပါ
လင်းဖို့ကြဲပနာ မိုးရိပ်ထူလားရေကောင်းခင်
အမှတ်ပီးဇယားအတိုင်းဆိုကေ
အကွက်မကျော်သင့်ယေ။

မြို့ပြဇာမထည့်ဖြစ်ခ ပန်းတခင်း
လရောင်အနမ်းတိနန့်မပျိုးခကေလေ့
ကဗျာပန်းတိတော့ခါပွင့်နီကတ်ပျာ
ယကေလေ့ . . .
ဇကန်းမနားရေ မြို့ဟောင်းထဲ
မင်းဇာဆုတောင်းခလေး ကဝေမချေ။

မင်းထလားခရေမြို့
ဒေဂုနှင်းရိုင်းတောထဲမာ
ဖေဖော်ဝါရီအံဖတ်ကိုစားသုံးယင်း
မြို့တမြို့လုံးလေ့ အီးခဲနီတုန်းသိ။ ။

နောင်ရိုး Aryan

သစ္စာမဲ့ ပန်းသီး

ဒီစမ်ဘာစွာ

နှင်းရိုင်းတောနန်းဖောက်ပြန်နီရေ

နတ်ဆိုးရို့စံပျော်ဖို့

အာရက္ခတံတိုင်းထက်က

‘ပျာလ်လ’ ရင်အုံကို ကျိန်စာတိုက်ရေညည့်လား။

ညဆွမ်းငှက်စားရေ ရသိ

သိဒ္ဓိပျောက်တေ ညည့်

ဈာန်မယစ်သိဆိုစွာ

ဒေါ်လာစား နဂါးမပါးစနန့်

သစ္စာမဲ့ ပန်းသီးကရာ

ကော့စမိတရားရုံးမာ

စွဲချက်ချပလိုက်တေ။

မုသားဆန်ရေ ခေတ်ပျက်ထဲ

အမှန်တရားတိ ဆားဖြစ်လားပျာ

ဝတီရင်ဘက်ထဲက သွီးနှစ်စက်

ဒီစမ်ဘာ၏ ၂၄ မိုင်တာဝီးပြီးပွဲမာ

ဘလိတ်ဓားထက်မာ အက္ခရာရွှီးလို့

မရဏမင်းကြီးလိပ်စာအမှားပီးလိုက်တေ။

စစ် 'က' သောပွဲ

မာနနန္ဒအတ္တတိ ယိမ်းက
ကျည်တောင့်တိ တေးခြင်းဆို
ဒိုင်း ဒိုင်း လက်ခုပ်သံတိပီးလို့
အာဏာသျှင်တိ အမြဲကြည့်ရေဒေစစ်ပွဲ
မြန်မာနိုင်ငံမာ 'က'အားကောင်းရေ။

သင်ပုန်းငတ်အနာဂတ်တိနန္ဒ
မျက်စိမဲ့ရေ ဘောဂဗေဒသမားတိ
ဆယ်တန်းမအောင်ရေ ငါ့ညီမောင်ကာလူနန္ဒ
ဖဲသမားကျော်စိန်လေ့ ယင်းပွဲမာဝင် 'က' ဖြစ်တေ။

ပဲပြင်သည်အဘောင်သျှင်သာစိန်လှလေ့
မျက်ရည်မကျအောင် ငိုပြုဖူးခရေ။
ဇာပိုင်လေး မိုးမလင်းနှိုင်းသိရေ ဒေပွဲကြီး။

ဒါဏ်ရာတပုံနန္ဒ ဝေဒနာသည်တိ
အချိန်ခါမဟုတ် လွမ်းသူတိ
ကျမ်းမာရေးမကောင်းရေ ရာသီသျှင်တိ
အချစ်သမား အယှုံးသမားတိမကျန်
မ 'က' မနီရအမိန့်အောက်မာ
ပေါ်တာဆွဲအား ကောင်းပါလတ်တေဆိုယင့်။

ယင်းပိုင်နန်း
 စစ်ဆိုစွာ လူစူးများရေ မြားတစင်းဖြစ်ပါလတ်တေ။
 မျက်ရည်ဆိုစွာ စားနီကျထမင်းမာ ရောယင်းက
 ဥပဒေဆိုစွာ လူထွီးများရေ ကွမ်းရည်ဖြစ်ပါလတ်တေ။
 အာဏာဆိုစွာ စစ်စီးရေ မြင်းနီတိဖြစ်ပါလတ်တေ။
 ဒို့တာဝန်အရေးသုံးပါးစွာ ရန်လိုနီရေ
 ခွီးတကောင်ပိုင်ဖြစ်ပနာ
 စစ်ပွဲကြားက ပြည်သူတို့စွာ
 ကျည်သံတိကိုရာ ဂါဝရပြုနီကတ်ရယင့်။ ။

လျှာထုတ်ကေ-လဝန်းနီ

အလင်းမဲ့ ညည့်ရိုင်းတပွင့်

အဆိပ်လူးမြားတိနန့်ဘဝကို ပစ်ကြည့်ဖူးရေ
လက်ထဲက ၁၉ နာရီတလုံးကို
အနှုတ်နန့်ပေါင်းစားလာစွာ ကြာပျာထော။
အမှန်တရားကိုမှတ်ပုံမတင်တတ်တေခါမာ
အကုသိုလ်ဖိနပ်ရိပ်အောက်က မျက်ခါးတပွင့်စွာ
အမိအတွက်ညာဖက်လက်တချောင်း မဖြစ်လာနိုင်ခ။

ချွေးရက်အိပ်မက်တထမ်းစာမာ
ဘဝ ဘဝအတွက် မျှော်လင့်ချက်တိ ထိုးထည့်ဖူးရေ
ရထားဘီးမှန်ဖို့လောင်စာမဖြစ်တေညည့်တိပေါင်းဖက်
အနာဂတ်တိတက်စီးမိလို့ ပစ္စုပ္ပန်ကိုစိုးဖြတ်ပီးရ
နှင်းကောက်မရလိုက်တေအဆုံး
မျက်ရည်ပန်းတခင်းနန့် အိမ်ပြန်လမ်းပျောက်နီခရရေ။

အချစ်ဂယ်လာရီ

အလွမ်းပန်းရနံ့တိ
အဆုပ်ကိုထဲ တစစီယူသွင်းလို့
ဒေရင်ကိုခွဲထားပစ်ခဖို့ဆိုကေလေ့ နင့်ဆန္ဒပါရာ
စကားပြောတိုင်း အဆန်လိုက်တတ်တေရင်ဘတ်ကိုမှ
ဒေကောင်က စချစ်မိခစွာမလား . . . ။

ယုံကြည်မှုနုနုညညနက်သော ငှါဘဝမာ
မျှော်လင့်မှုကောင်းခင်က
နှင့်အပြုံးတိကြွဆင်းလာကေ
အခါခါပျော်ဖူးရေ
ယင်းပိုင်နန့် . . .
ရွှီးလက်စ ငှါအိပ်မက်တိ ပိုလို့ရွှီးအားကောင်းခရေ။

အဆုံးမဲ့ ငှါမေတ္တာတိ
ယုံကြည်စွာစီးပြပစ်လစ်ဖို့ ဆုတောင်းလွဲဖူးတောင်မှ
ငါဆိုရေအကောင်က ဘဝမာမဖြစ်နိုင်စွာကိုပင်
အသုံးဝင်ရေလို့ မျှော်လင့်ဖူးသိယင့်။

အလှမပါသော
အချစ်ငတ်ပန်းတပွင့်မာ
ဆန္ဒလူးတောင်းဆုတိ အထပ်ထပ်နန့်ပယေ
မွမ်းကျပ်သော ငှါအသက်ယူသံတိုင်းမာ
နှင့်ပုံရိပ်တိ အီးချမ်းစွာအိပ်စက်တေ
ယင်းပိုင်နန့် ဘဝမာပျော်ပါရေ။

ဆန္ဒနုန့်သီချာဆုံးဖြတ်ပါ
ခဲဖျက်များသောလောကမာ
အချစ်ကို နွီးထွီးစွာပန်တတ်ဖို့
နုလုံးသားတိက ရိုးသားဖို့လိုရေ။
(ဘဝ ဘဝတိအတွက်ဆိုလိုချင်စွာရာ)

အတိတ်ပန်းချီတိပြန်လှန်ကြည့်ကေ
ပျားအိမ်မီးကျရေပိုင် ဖြစ်တတ်လာရေ
ငှါကိုငါချစ်တေပိုင် မင်းကိုလေ့မြတ်နိုးပါရေ
သတိရခြင်းကမ်းစပ်ကို ခြံတွဲမထိုင်ချင်
ငှါဘဝကို သီချာစွာဘာသာပြန်ပြဖို့က
နင်စွာ အလိုအပ်ဆုံးဗိသုကာ ဆော့ဝဲတချပ်
လွမ်းဆွတ်မှုနုန့်တမ်းတမိခါတိုင်း
ဒေကောင်ရင်ဘတ်စွာ ကောင်းကောင်းနာလို့ပါ။

အေးလေ အနုညံ့ဆုံးရင်ခုန်သံတိနုန့်
ပန်းဖြစ်ဖို့စကားတိကို ရိုးသားစွာခိုးနမ်းရလူအတွက်
ချိုသောဘဝတခွက်ရဖို့
မေတ္တာတရားတိ ခိုးပျိုးပြခစွာတိ
မိုးအခါခါခေါင်ရေ လယ်ပြင်ပိုင်ထော
ငှါအချစ်ဂယ်လာရီထဲ
ပျော်ရွှင်မှုတိ သဲလွန်စပျောက်နီတုန်း။ ။

လျှာထုတ်ကေ-လဝန်းနီ

ကန္တာရမှ နွီးထွီးပျူငှာစွာ ကြိုဆိုပါ၏။

ဆင်းရဲခြင်းမီးစွာ
ရိုးမတခုလုံး လောင်ကျွမ်းပြီးလို့
သင်ပုန်းငတ်တေရွာထဲက
ချွေးထွက်ကောင်းရေ ဝံလက်ချေတိကို
မိုးရာပါကံတထမ်းနန်း နှင်းကောက်ဖို့
ကန္တာရထဲ ခုန်ဆင်းခိုင်းလိုက်တေ။

ပညာနတ္ထိနန်းဖင်စုတ်ဂေါင်းပြတ်တိမာ
ခတ်ကိုလက်နန်းအသာချေစမ်း
စေတနာအပြတ်နန်း ဇိုင်းပြတ်တေသုခဘုံတိမာ
အပြုံးပန်းတိ လိုက်ခိုးယင်းက
သောကမိုးရီ အခါခါစွတ်ဖူးကတ်ရပျာယေ။

ထော ဖေသာငတ်လို့လတ်
ပစ္စုပ္ပန်အသိနန်းဒေါ်လာပါးစထဲ
ဆန္ဒတပုံနန်း လောကခံကိုဒူးထောက်
အပြစ်အနာကင်းမှုနန်း ရိုးသားသောမြစ်တိအဖြစ်
လောကခံလိုရာဝင်စီးဆင်းယင်းက
သစ္စာပန်းပန်နှိုင်းဖို့ နီဝင်ရခြင်းတိ အလီလီ။

အဝေးလျှာထုတ်ကေ တချက်ကြည့်
 ပန်းမဖြစ်တေအလွမ်းတထမ်းနုနု တချို့ဝံလက်တိ
 ကုဆီးကင်းရေ ဒုက္ခဆောင်းပြင်မာ
 အိပ်မက်တရံစာ လိုအပ်တေတွက်လတ်ယေ
 ကန္တာရနုနုပန်းလားကောက်လီစွာ
 နာရီတိ အိုဟောင်းခလီယင့်။ ။ ။

လျှာထုတ်ကေ-လဝန်းနီ

မောင်ကြီးညှင်သို့

မောင်ကြီးညှင်
အကျွန်ရဲ့နှစ်ယောက်ချစ်ခရေအချစ်ခရီးလမ်းစွာ
ပန်းခင်းလမ်းအတိဖြစ်ပါယဉ်။

မောင်ကြီးညှင်
ချစ်ခလီသမျှတခါချေပင် စိတ်လိုက်မာန်ပါမုန်းမိန့်ဖို့ကို
စိတ်ကူးထဲတောင်မစဉ်းစားဝံ့ပါ။

မောင်ကြီးညှင်
အကျွန်ရင်ထဲနှလုံးသားအစုံ၏ ဆန္ဒမာပါလေ
ဝီးလားဖို့အကြောင်းကို စိတ်ကူးမာပင်မတွေးဖူးပါ
ယေဒါလေ
မောင်ကြီးညှင်ဘဝ
အမြင့်မာစံပျော်စွာကိုမြင်ချင်လို့
အကျွန်ရင်ထဲ အသက်ထပ်မျှချစ်ပါလေ
ပိုင်ဆိုင်ဖို့ဖွင့်မဟရဲဘဲ
အကျွန်လေ ဝေဒနာတထွီးနန်းရပ်ကျန်ခလူပါရာ။

မာယာ

မုသားတိပေါများနီသလောက်
အမှန်တရားတိယှားပါးပါလတ်တေအခါ
'မာယာ' ဆိုစွာ
မုသားဝင်္ဂီပါထဲက
လှည့်ကွက်တစ်ခုပါ။

သမုဒယဆိုစွာကို ဇာမှန်းမသိဘဲနန်း
အချစ်ကိုဒသန မဖွဲ့စီချင်ပါ
အချစ်ဆိုစွာ မေတ္တာတိစီးဆင်းနီရေအတွက်ကြောင့်
စာညှာမှုအပြည့်ဟိပါကေလေ့
မာယာဆိုစွာက
အကွန်ဆောင်တတ်တေသူရို့၏
လျှိုဝှက်ထားရေ
အကောင်းစားလက်နက်တလက်ပါ။

မထင်ထားခပါ
အထာမနတ်တေသမင်တကောင်၏
ကံကြမ္မာစွာ
အငိုက်ဖမ်းဖို့လိုက်ချောင်းနီရေ
ကျားတကောင်၏ညစာဖြစ်လာလိမေလို့ . . .

မင်းကိုယုံလို့
ကံဆိုစွာအနီးဆုံးငရို့နှစ်ယောက်အတွက်
ဝီးလားလိမေလို့
ငါထည့်မစိုင်းစားဖူးခပါ။

ကတိ ဆိုစွာကို
မစောင့်ထိမ်းနှိုင်းဘဲမခံယူသင့်ပါ
မိန့်ကွန်ဆောင်ထားစွာလား
မိန့်နီစွာလား မိန့်ခွန်းတော့မထုတ်ပါပျာဝေ။
မမှတ်မိကေထပ်ပြောပီးမေ
နှစ်ယောက်သားမဝီးရအောင်
ကတိသစွာထားဖူးခရေမဟုတ်လား။ ။

Loso (လေးမြို့မြို့)

ဖြေပီးခပါ

အကြင်နာ ရင်ဗလာနန့်
မက်မောမူလောဘတိက ပုံမှန်ထက် ပိုများနီရေအခါ
မာယာကို အသုံးချပနာ မကြင်နာပဲဂေါင်းညိတ်ခစွာလား။

အကွန်ဆောင်ဖို့ ကျွမ်းကျင်သူရို့အတွက်
မုသားစကားတိက
သူရို့ကြားမာ ဆီးသကြားထည့်စရာမလိုပဲ
အချို့များနီပါရေ။

လောကီလူသားပီပီသသ လိုချင်တတ်မက်မှုကို
ငါအပြစ်မတင်တတ်ပါ
ငါဆိုရေအကောင်စွာ မင်းအတွက်ချစ်စရာကောင်းရေ
အရုပ်တရုပ်ဆိုကေတောင်
အသုံးမဝင်ရေ အကောင်မှန်း
ငါနားလည်လိုက်ပါရာ။
ငါက ငမဲ့ မင်းကသဦးဖြစ်ချင်ရေလူ
ကြိုက်တေ လမ်းကိုရွှီးလိုက်ပါ ချစ်သူ . . .

နောက်ခိုင်းလို့မလားခင်မာ
 ငါ့မျက်နှာကိုတည့်တည့်ကြည့်ပြီး
 တခုလောက်တွေ့ ဖြေပီးခပါ
 မျက်လုံးကျယ်လို့အမြင်ကြီးစွာလား
 လောဘတတ်လို့မမြင်လိုက်ပျာလား
 သဠိုးဖြစ်ချင်လို့ မင်းရင်ဘတ်ကိုဒဏ်ခတ်ထားစွာလား
 စိတ်မာဟိရေအတိုင်း ဖြေပီးခပါ။ ။

Loso (လေးမြို့မြို့)

ခွင့်ပြုပါသခင်

သခင်

နီဝင်ဆည်းဆာ ညဇာချိန်၏
သာယာလှပ သဘာဝသည်
သခင့်အတွက်ရာဖြစ်ပါစီ။

သခင်

ဝဋ္ဋာတခွင် အာကာပြင်၌
တိမ်စိုင့်တိမ်တိုက် လာလုံးဆိုင်း
တိုက်လုံးမှောင်ပြီး ရွာရေမိုးကြောင့်
ကမ္ဘာမြီထက် မြက်ပင်သျှေတိ
ကခုံကတ်တေ။

ယေဒါလေ့ . . .
ငါဆိုရေအကောင်က
သခင့်အတွက်ငွီရည်ဖွဲဖွဲ
တိမ်တိုက်တခုလောက်
အစွမ်းမဟိနှိုင်ခပါ။

သခင်
လောင်မြိုက်တေခါ နီမင်းကြီးက
အယွဲတိုက်ပျာ ဟားတိုက်ရယ်ရေ
ယေဒါလေ့
ငါဆိုရေအကောင်က သခင့်အတွက်
သခင့်အသက်ရှင်သန်ဖွဲ
နီမင်းကြီးပိုင် နွီးထွီးမှုလေ့
အပြည့်အဝမပီးနှိုင်ခပါ။

ယေဒါလေ့ သခင်
သခင်ရာခွင့်ပြုဖွဲဆိုကေ
သခင့်ကောင်းခင် ရင်ခွင်ထဲမာ
အကျွန်၏ လင်းလက်တောက်ပရေ
မေတ္တာကြယ်စင်တလုံးတော့ခါ
ထွန်းတောက်ခွင့် ပီးသနားပါ
သခင်။ ။

Loso (လေးမြို့မြီ)

ညည့်ရိုင်းကိုယ်ထည်

ထော သတင်းစာဂေါင်းကြီးပိုင်းမာအက္ခရာမပါ
လက်ရွှီးမှုစာတမ်းက ၁၁၊မဉ္ဇန(နိုင်)၀၀၁၁၄၆ အမှတ်စဉ်မာ
ပင်လယ်နန်းရိုးမ
ဝင်သက် ထွက်သက် ဖောင်းပွနီကြောင်းဖော်ပြ
အနာအဆာများသော
ပန်းသီးကိုပြန်ချိုပြွင့်ပြုပါ . . အို . . . ရိုးမ။

ဗိတာမင်အားနည်းနီရေအသက်ယူသံမာ
မျှော်လင့်ချက်အသိ အချိန်အသိ
မလည်ပတ်တတ်တေ နာရီတလုံး၏အန်ဖတ်မာ
သုံးလီသုံးဖန်သီဆုံးခြင်းကောင်းခင်တခုထဲ
ပက္ခဒိန်တိကျဝင်ပါလတ်စွာ
၂၃၁-မြောက်ရောက်လာခြင်းမှအပ
မအီးစက်သောနှင်းတိရာ ဘဝတိဖြစ်တေ။

ကြွေမွဲခြင်း စက္ကူခြပ်ရိုးတစုံ

ဆယ်စုနှစ်တခုကျော်နန်းရက်လုပ်ထားရေကြိုးမျှင်ချေပါရာဝေ
အပြုံးချေတိဆည်းဆာရောင်သန်းခကတ်တေနှန်း

ယေကေလေ . . .

မင်းနှုတ်ခွမ်းပါးမာအချင်းသွယ်

ဘဝချေတိဆောင်းခိုနီတုန်း

တိမ်းစောင်းခရေအီကွေတာမျဉ်း

ရင်ဘတ်ထက်မာကမ္ဘာတခုအသစ်စက်စက်

မှောက်ကျလီပျာ

ခရီးလွန်နာရီတလုံး၏သစ္စာတရားကို

ဘာသာပြန်ခွင့်မဟိလီခ

အလွမ်းတိနန့်တခန်းရပ်

ငါဇာပိုင်ဖြတ်ခီရဖို့လေးဝေ။

ချစ်ခြင်းမေတ္တာစွာအနာဂတ်တခုသို့ဦးတည်
ယေပြီးကေလွဲလီယင့်လေ
ပင့်သက်တိုင်းမာနှင်းဆီမပွင့်နိုင်
ကြိုးပြတ်လားရေမိုင်တိစွာ
တွဲလက်တစုံကို ဥဩဆွဲလီပျာယေ။

လွမ်းရေ
ပင်လယ်လီယှူဖူးရေဒေအဆုပ်တိ
ကြယ်ကြွီချိန်ဆုတောင်းမှားခြင်းဖတ်စာနန့်
တဘဝစာအတက်အဆင်း
မှားလီခပျာနှန်း
တသက်စာအနီးဓာတ်တခု
မင်းအတွက်မပွီးစပ်ပီးနိုင်ခပျာဝေ။

ဒေဂုတော့
နောက်ကျလီခြင်းအသိတခုမာ
စောဒက တက်ခြင်းကို
အုတ်မြစ်မချချင်ပျာ
ခွင့်ရွတ်ခြင်းကို ခွင့်ရွတ်ခြင်းနန့်တေးပေါင်းချုပ်
ငါမဟုတ်တေကမ္ဘာတခုမာ
မင်းတယောက်ပျော်ရွှင်ပါစီ . . .
. ။ ။

မင်းသျှင်(ကျောက်ဖြူ)

အလင်းပျော့တမ်ပို

ကိုယ်ထူကိုယ်ထန်စွဲတိ
အမှတ်စဉ်မသိသော ရွှင့်မျိုးခြင်းတိထဲ
အပြုံးတပွင့်၏အတောင်ဖံမာ
ညညှိရိုင်းတိနန့် ရင်ဘတ်ကိုထွန်းညှိပီးလိုက်တေ။

တဆတ်ဆတ်တုန်အောင်လွမ်းမိပါယင့်
မိုင်များစွာကန္တာရပြင်ထက်မာ
ညှိုးခြောက်ခြောက်အိပ်မက်အနွမ်းတထည်ကို
နွီးနွီးထွီးထွီးဝတ်ဆင်နှိုင်ဖို့
အဝီးအပါးမညီမျှခြင်း ကမ်းလက်တဖက်စွာ
ကံလာတာဓမ္မသတ်ကျမ်းမာ
ဘဝကိုလာလောက်ပြဋ္ဌာန်းပီးနှိုင်ပါဖို့လေး။

အရိပ်ဝေးကခြံလှမ်းတိ
နို့သောက်လို့နှင်းပျောက်တတ်တေခါ
အရောင်မပြောင်းတတ်တေအမှန်တရားမာဝင်အိပ်ကြည့်ဖို့
ကိုယ်ကျင့်တရားကိုတော့ အရောင်မထင်းဖို့လိုပါရေ . . ။

မသိစိတ်ထဲကရင်းမြစ်နိယာမ၏
လိုအပ်ချက်လက်တစုံကိုထည့်သိမ်းဖို့
ညဇာဖက်တခုကိုမိုးဇတ်ယင်း
ကိုယ့်ဖက်မပါရေရာသီထဲမာ
သိုးမဲတကောင်အဖြစ်လေ့နီတတ်ခပျာ . . . ။ ။

ကိုယ့်အရိပ်မာကိုယ်
ခြံဆန့်လက်ဆန့်အိပ်ဖို့ဘဝတခုအမှန်လိုပါရေ။

မင်းသျှင်(ကျောက်ဖြူ)

ပြည်တွင်းစစ်

(၁)

ဒေါသ မောဟ အတ္တတိက
အန်ထုတ်ထားရေသက်တန်းရင့်ရောဂါထဲ
ငိုသံအလိပ်လိပ်များ
ခြံပြတ် လက်ပြတ်
သွီးအလိမ်းလိမ်းအော်ဟစ်သံများ
အနိဋ္ဌာရုံမြင်ကွင်းများစွာတိ
ရိုင်ဖယ်တလက်ထဲကပြုတ်ကျ
ဘဝများစွာတိပီးဆပ်လိုက်ရပျာ။

(၂)

ကိုယ်ချင်းစာတရားအသိ
လူမပီသသောအတ္တလက်တဖက်က
အငြိုးတကြီးနုန့်စစ်မီးကိုဖွင့်ဖောက်
အရို အနောက် တောင်မြောက်မာ ယမ်းနဲ့တိ
လူ့ဘဝအလှကို မုဒိန်းကျင့်လိုက်ပျာ။

(၃)

မိုင်းကွဲခံရွာတိ
ကိုယ်အင်္ဂါပျက်စာသင်ကျောင်း၏အသက်ယှူမဝခြင်းများ
အသက်မပါအနာဂတ်တခု
တာဝါပစ်ခုံးနုန့်ဖွင့်ပီးလိုက်ပါယင့်။

(၄)

အိုးပစ်အိမ်ပစ်အမှန်တရားထဲ
ခြံပြတ်လားရေစစ်ဖီးသင့်တိ
မရိတ်သိမ်းလိုက်ရ တောင်ယာခင်းမာ
ငြိမ်းချမ်းမှုကို
ပုံးသံတိနန့်ရင်းနှီးမှုပြုလီပျာ။

(၅)

ကြောက်စိတ်တိပုံးလွှမ်း
အပြစ်မဟိမျက်ဝန်းတိ
သွီးမတိတ်ခြင်းရင်းမြစ်မာ
တိုင်းပြည်စွာ
နစ်ပြီးယင်းနစ်
ယင်းယှဉ်စွာရေ
ပြည် တွင်း စစ် ။ ။

မင်းသျှင်(ကျောက်ဖြူ)

တန်းထား

ခြံလှမ်းတချက် ရှိဆက်ဖို့ခက်နီချိန်မှာ
သူကဝင်ပြီးလိုင်စင်းပီးရေ။

လားရဖို့လမ်းခရီးမှာ
ဖဝါးများစွာ လိုရာရောက်ဖို့
သူ့ဘဝနဲ့ ပေါင်းကူးပီးရေ။

သိမ်သိမ်မိမိမိချေ လျှောက်ဖို့လားလျှောက်
ကြမ်းကြမ်းတမ်းတမ်း လျှောက်ချင်ကေလျှောက်
သူ့ကိုယ်သူ့ဖြန့်ခင်းလို့
အပြုံးမပျက်ဝပ်စင်းပီးရေ။

ယေဒါလေ့
ဝမ်းနည်းဖို့ကောင်းစွာတခုက
သူ့ရင်ဘတ်ကို ဖြတ်လျှောက်လို့
လိုရာခရီးပေါက်ရောက်ကက်တေအခါ

အပြုံးအငယ်ချေနန့်
ဂေါင်းတချက် စောင်းပြီးကေများ
အသိအမှတ် ပြုလီဖို့လားလို့။

အကြိမ်ကြိမ် မျှော်လင့်မိခကေလေ့
နောက်ခိုင်းလားခကက်တေခါ
နောက်ကုန်းပြင်တိကိုရာ
နာကြင်စွာလက်ခံရမြဲရာ။ ။

၁၁၅၅

အိမ်လွမ်းကြယ်

တဖြတ်ဖြတ်တောက်ပနီရေ ကြယ်ချေဝေး
လွမ်းဆွတ် သတိရနီပျာလား
အနားမာ ဇာသူလေ့မဟိရေဘဝ
နီသားကျရေ ဆိုကေလေ့သင့်

တခါတရီတော့ခါ
မိသားစုလက်စုံစားပွဲကို လွမ်းရေ
အချေခါက
အမင်ပြောပြရေအိပ်ရာဝင်ပုံပြင်
ပြန်ပနာ နားထောင်ချင်သိရေ။

အလွမ်းသင့် ကျိန်စာ

ရီလယ်မာ တက်ကျိုးဖူးရေခါ
ငှါရင်က ပန်းနုနွဲ့ပေါက်စွာတောင်နာနီရေ
ဟိုး . . အယင်ကခါဆိုပြီးကေ
အတိတ်ကို
ဒေဝထုတပုဒ်ပိုင် ဖွဲ့နွဲ့ပြန်ပြောပြဖို့
ဒေခန္ဓာက အင်အားမဟိရေခါ

ကံကြမ္မာက
အမှတ်လျော့ပေါင်းလေ့ များလားခပျာ
တံလျှပ်ကို ရီထင်
ရွှီသမင် အလိုက်မှားခလို့
ဟားတိုက်ခံရရေ ဘဝ
ညည့်ညည့်ဆို
အလွမ်းတိနုနုရာ ကခုန်'က'ခရေ။

ရီစုန်မျိုးလိုက်တေ မာနနုနု
ရာသီလွန် သက်ပြင်းတိကြားမာ
ရက်ပြတ်ရက်ပြတ် ညှပ်ပါလားရေ
ရည်မှန်းချက်တိက
မိုးရိပ်တိပိုင်ဖရီဖရဲ
ဗရဗရီကြွေမွနီဆဲရာ။

ဆုပ်မိလို့ စူးရေဒဏ်ရာတိက
သွီးအစက်စက် ကျနီကေလေ့
ယင်းရသကိုးပါးထဲမာ
ခါးသက်ခြင်းကို ချိုမြိန်ပစ်ခစွာတောင်မှ

ဝေဒနာချေ
ဝင်သက်မာ မင်းအပြုံး
ထွက်သက်မာ မင်းအမုန်းတိနန့်
ကပ်ငြိနီရေ ငါ
မြတ်ဗုဒ္ဓ၏ ကိလေသာအဆုံးအမကို
လိုက်နာဖို့ ခက်ခဲနီသိရေ
ထုံထိုင်းထိုင်း ဆစ်ဆီတကောင်
ဖြစ်နီပျာ ထင်ပါယင့်။ ။

မြတ်သဇင်

မိုးရိပ်ကင်းစင်အာကာပြင်

အာကာပြင်မာကြယ်တိမစုံသိကာ အဘာ
အလင်းရောင်တိက
ပြန်လင်းလိုက် ပြန်မှောင်လိုက်နန့်ဖြစ်နီရေ
စားရေထမင်းကြမ်းတိက
အဘာ၏ချွေးစက်တိနန့်ရင်းထားရေ အာဟာရ

အဘာကြောပြင်တပြင်လုံး
ဗလာကျင်းဖြစ်နီကတ်တေ
အဘာ၏မေတ္တာတရားက
လမင်းကြီးထက်အဆတရာမက
ထိန်လင်းတောက်ပနီရေအဘာ။

အဘာ၏ချွေးစက်က
သားသမီးတိအတွက်
အနာဂတ် ပန်းခင်းလမ်းလား
ကောင်းခင်ကြီးက ကျယ်ပြန့်ရေ
ပင်လယ်ပြင်တိ ခမ်းနားရေ
ကြယ်ချေတိက လင်းလိုက်မှောင်လိုက်နန့်
ဒေကမ္ဘာကြီးမာ သူရဲကောင်းကြီးအဖြစ်
မေတ္တာစွမ်းအားအကြီးမားဆုံးနန့်
ခွန်အားအကြီးမားဆုံး
သူရဲကောင်းစစ်သူကြီးပါ အဘာ။ ။

ဖြူလေးနွယ်

ယံစားခြင်း

ခံစားချက်တိကိုမျိုသိပ်လို့သိမ်းထား
ရည်ရွယ်ချက်ကြီးရေဆန္ဒတစုံအတွက်
ပီးအပ်လိုက်ရစွာက . . နှလုံးသား

နညံ့ရေလက်တိကိုအားပြု
ဆန္ဒတခုအတွက် ဒေရင်ကိုအရင်းပြုပျာ
ဆွဲမိလိုက်ရေပန်းချီကားတချပ်
စုတ်တံတချက် မာယာလက်နက်
အရောင်စုံရေမှင်တိကြားမာ ကျယှံးလားရေငါ့အဖြစ်

ရွင့်ကျလားရေမှင်စက်တိက
စွန်းထင်းလားရေပန်းချီကားထက်
ပေပေယေယေ ဖြစ်လားရေ။

စိတ်ကူးတိကိုဖယ်
အတွေးတိကိုထုတ်
ငါ့စိတ်ဒဏ်ရာတိကအစွန်းအထင်းတိပယ်ပျာ
ယံစားမိရေ ငါ့အတွက်
အပြစ်ဒဏ်ချမှတ်လို့မရရေ
ဂေါင်းစိုင့်တိနန့် အစွန်းအထင်းတိကြားမာ
ငါတခါပြန်လို့ဆီးချယ်ချင်သိရေ။ IIII

၂၇.၁၂.၂၀၁၅ (ဖြူလေးနွယ်)

တိတ်ဆိတ်သော ဒေည

လိအီးအီးချေ တိုက်တေ
အီးမြရေဆောင်းညမာ
ပွေးပွေးဖြူရေနှင်းတိက
ဝေဟင်ထဲကကြွီကျဆင်းလာ

ဒေမြီပြင်မာ
ပွေးပွေးဖြူရေနှင်းတိ
ဆုပ်ကိုင်မိရေတဒင်ချေ
နီရောင်အောက်မာစိတ်ထဲပြုံးမိ
ရင်ထဲသိုဝှက် သိမ်းဆည်းမိ
စိတ်ထဲပုံဖော်တွေးကြည့်ယင်း
ကိုယ့်ဘဝ၏ကုသိုလ်ကံကို
မေတ္တာပီးပို့စိတ်ဖြေကြည့်ကေ
စိတ်ဒဏ်ရာက သက်သာရေထင်
ဆိတ်ငြိမ်ရေဒေညည့်
သောကတိကဖြေမပြေ
ရိုဘဝက ဒေဝဋ္ဌ်ကြီး
ဒေဘဝမာ ကုန်အောင်ဆပ်မေ
ပြေပါစီလေ ပြေစီချင်ပါရေ။ ။

၂၃.၁၂.၂၀၁၅ (ဖြူလေးနွယ်)

–Aspk

စိမ်းကားသူ

မေတ္တာ အရေးကို
သစ္စာနဲ့ ပီးအပ်နီချင်သူဖြစ်လို့
ယောင်ဖယ်လို့မစိမ်းကားပါကောပလင့်

မကြည်လင်ရေမျက်နှာထားနဲ့
မပြုံးရွှင်အကြည့်ချေတိအောက်
ယောင်ဖယ်လို့တိန်းနီစွာလား
စိမ်းကားသူချေ။

အတိတ်တိကိုပြန်တွေ့
ဖြေသာပျာကြည့်ကေလေ့
ဆွေးနီသူရင်ထဲ
အပူတိထပ်တိုးလာရေ

ရင်ထဲမှာ နွမ်းအလွမ်းတိနန့်
ဂနီတိုင်မမိန့်နှိုင်းခလေ။

ပန်းတိဝီနီရေ မွီရာလေ့
အိပ်မပျော်နှိုင်း
အသည်းမခိုင်းရေ
ဒေနှလုံးသားမာ
ဒဏ်ရာတိရာနက်နက်လာ။ ။

၂၃.၁၂.၂၀၁၅ (ဖြူလေးနွယ်)

အသံ

ခဲဝါဥပါးကွက်ချေကြောင်ချီးလူးလို့
 ဂေါင်းထက်မာမက္ကလာချေကိုဆောင်း
 ခါးချေထက်မာ
 ယက်သဲ့ချေတဆောင်
 ပယိုင်းချေတလုံးချပ်
 ပါးစမာလေ့
 ကွမ်းချေတယာမုံ
 ပန်းဒူချေကိုကိုက်ပျာ
 အင်းပြင်နားမာ ရစ်ဝဲရစ်ဝဲ
 ဗျိုင်းချေပိုင်တဖုံ
 ကျွဲချေပိုင်တမျိုး သရုပ်ဆောင်
 မိုးရိပ်နီပူ စွက်စွက်ဆူစွာပင် ဂရုမထူ
 မင်းလေ . . .

ကြာညိုပန်းချေတပွင့်
 နားမာဆွတ်လို့ပန်ထားသိရေ။

အဝေအပုချေ . . .

ကျောင်းမာပျော်ဖို့မင်းအရွယ်
 ကျောင်းဖက်ကိုခြံဦးမလှည့်
 ကျောင်းတက်ခေါင်းလောင်းထုသံနားမာမချို
 လွယ်အိတ်အလှပချေတိပင်အိပ်မက်မမြင်
 စိမ်းစိုနီရေဘဝမြီနုကျွန်းကို
 ကုသိုလ်ကံတရားဆိုရေ အကြောင်းပြချက်ဆားစုလို့
 တသက်စာဆားစိမ်ထားလိုက်စွာလားဝေ။

ဝမ်းခဲနာ

ရာဇပ္ပားများရေအိမ်ပါ။

အကျွန်ရေ

ရက္ခဝဏ္ဏစာမျက်နှာဒေါင့်စွန်းချေက

လွမ်းနာကျ

ကြက်မဝပ်မတကောင်ပိုင်ပျာ

လှိုင်းလီပြင်းထန်စာပီနယ်မာ

ရင်တွင်းဝေဒနာအရွယ်မြောက်ဖို့

ကဗျာသဏ္ဍာန်နန်းဖောက်ထုတ်ပြ

အပူလွန်မိုးနန်းသန္ဓေတည်လာ

ရင်သွီးတိအတွက်

စုန်လီဝင်ရေတန်းခါးတပေါက်လောက်ဖွင့်ပီးကတ်ပါ

မိုင်းပြာပြာ မြို့ရိုးအပြိုထက်

ကြောင်ချေတကောင်ပိုင် ဆင့်ခွင်ထိုင်နီပါယင့်။

လက်ထဲမာ
လောင်းရိပ်ပိစာအုပ်ပါးပါးချေတအုပ်
နာရီအသီတလုံးနန့်
အမင်ဆိုပြုဖူးရေ
မှတ်မရတရ အရွေ့သာခြင်းတပုဒ်ကို
အဖြေသိချာမသိဘဲ
ကျွန်နွံအိုင်မာ နှာခေါင်းနစ်
နီဝင်လားဖို့ကြောက်တေ လူသား။

အို . . ရက္ခိတရို့
ဂေါင်းစီးတခုအောက်မာထိုင်
သုတ ရသ အာဟာရအပြည့်နန့်
ရိုးမပိုင်ခိုင်ခန့်ရေစာပီကိုမို့
စုံစုံညီညီကလောင်သွီးဖို့နီရက်တိ
အိပ်မက်ထဲပင် ဟိကတ်ပါယင့်လား။

သုခုမဥယျာဉ်ထဲမြောက်လီချေသွန်
သဇင်တံချေတိလန်းလို့
ဒီစမ်ဘာ ဆောင်းတညည့်ရောက်ကေ
သွီးသားချင်းထပ်
စည်သံဟိန်းလို့ချီတက်လာလတ်ကတ်ပါ
ဇာမနီပင်ခြုံတောထဲက အကျွန်
သျှင်မြဝါအသည်းကိုငှားပျာ
ကဗျာရွက်ဖို့စောင့်နီပါယင့်
စောင့်နီယင့်။ ။

မုနီမြီမျိုးအေး

ငရဲသားပါ ဘုရား

အသျှင်ဘုရားကို ဖူးမျှော်လီတိုင်း
နတ်သျှင်နှောင်ရတုထဲက နတ်ပင်ကို
မြင်မိပါရေဘုရား။

အောင်သပြီပန်းနန့်
ညောင်ရည်အိုးထိုးချင်ပါယင့်
အသျှင်ဘုရား ရှိက
အာဏာပန်း ပါဝါပန်း
သပုံခွက်ထဲကဆပ်ပြာပန်းတိကို
အော့နှလုံးနာပါရေဘုရား။

မအောင်နွယ် လက်သုပ်

မူပိုင်သံပျောက်
ကော်ပီ(copy)သံစိုင်းသာခြင်းတပုဒ်
အမျိုးသားရိုးချို နာမ်မှန်သမျှ
ကြက်သီးမိုးညင်းထယင်း။

ထရံမာချိတ်ထား
သက်တမ်းကုန် ပက္ခဒိန်တချို့
ကိုယ့်ကံကြမ္မာကိုယ် ဖန်တီးခွင့်မဟိ ဘဝမာ။

အိပ်တန်းပြန်ငှက်ချေတရွှီ
(သို့မဟုတ်)
အမှောင်ဖြူဖို့ မြားတစူး
ရိုးတဖက်မာ သောင်တင်နီရေလတ်။

မင်းမဟိရေ အိမ်ရခိုင်
ငါမဟိရေ အိမ်ရခိုင်
ဇာပိုင်ပျော်ခီဖွဲ့လေး။

လေးနဒီပေါင်းဆုံဖွဲ့
ရခိုင်ပင်လယ်ပြင်ကိုစီးဝင်
မင်းနန့်ငါပေါင်းဆုံဖွဲ့
မင်းမိသားစုထဲစီးဝင်။

သီချာပါရေ
ခေတ်သစ်ရခိုင်ပင်လယ်
ရန်ကုန်မြို့။ ။

မုန့်မြို့မျိုးအေး

၅၂

အမုက်ကိုဖြတ် အဆစ်သတ်၍
တည့်မတ်ဖြောင့်သွယ် ခွဲခြမ်းငယ်လို့
ထုတ်ပယ်အဖျား အသားယူမည်
မထူမပါး အမျှင်များကို
ထိမ်းထားပျင်ဆင် နှီးတပင်ကြောင့်
ဆွဲငင်နှောင်းနှောင်း စည်းအားကောင်းခါ
စုပေါင်းထင်းရိုး သူငါချိုးလည်း
မကျိုးအန်တု မမာပြု၏။

တခုမခွဲ လက်ချိတ်တွဲစီ
အုပ်ကွဲမခံ ဥာဏ်ရည်ကြံမှ
ဝိုင်းရံနိုးကြား တသွီးသားတည်း
စိတ်ထားယုံကြည် ကိုယ့်ရွာပြည်တွက်
ရည်ရွယ်စုပေါင်း အသားကောင်း၍
ပျော့ပျောင်းခိုင်မာ ဖြောင့်မတ်စွာနှင့်
လိမ္မာပါးနပ် စည်းလုံးကတ်ဖို့
ရှည်လတ်မျှင်မျှင် အကာစင်သည့်
အမြင်ကျယ်ပြန့် ကိုယ်ကျိုးစွန့်သို့
နှီးသန့်တပင် လိုအပ်သည် ။ ။

ခိုင်ရိုးလ

ပြိုင်လောင်းပွဲ

လီရူးတိုက်မြူး ပန်းမန်ဖူး
ရာသီ နှစ်သစ်ကူး။

ကြွလူးတဖန် ရွက်နုပြန်
ဝေါငှက်ချေက တွန်။

ချိန်မှန်စဉ်မြဲ၊ ခြိမ်းခြိမ်းသဲ
ရိုးရာပြိုင်လောင်း ပွဲ။

တက်ဆွဲအားပြိုင် ဟန်ချက်နိုင်
ဝင်ရောက် ပန်းဖူးတိုင်။

တကျိုင်းသင်းဖော် သံကျပ်အော်
ယီးလဲယီးဆွဲ လှော်။

နှံ့ပျော်စိုင်းဆက် ရိုးရာမက်
နို့လယ် အားလပ်ရက်။

ဝိပဿနာသုတ်

မိုးထက်စည်သံ ဟိန်းဟိန်းပျံ
လက်ခုတ်ဩဘာ ညံ။

အောင်လံထူရှင့် ဂုဏ်ယူတင့်
အပြုံးပန်းတိပွင့်။

ထပ်ဆင့်စိတ်ထား ကာယအား
မျိုးချစ်စိတ် နိုးကြား။

ကြိုးစားငွေကောင်း ပဲ့ကိုင်နောင်း
ရိုးရာ ရှိပြိုင်လောင်း . . . ။ ။

ခိုင်ရိုးလ

ယိမ်းကခြင်း

နိုသစ်ပျော်ရွှင် ကောင်းကျိုးဆင်ဖို့
 ခြည်မျှင်ခြမ်းမျှ မာန်ဒေါသကို
 ငယ်လှဘဝင် တွေးမထင်သင့်
 ကြိုတင်ကောင်းမှု နိုတိုင်းပြုပါ
 ခရုပတ်အိမ် ဥာဏ်ရည်တိမ်လို့
 ဖျင်းသိမ်အကြံ စိတ်ညှာတံထဲ
 နောက်ခံကုတ်ကုတ် အဖြေထုတ်ခါ
 ဇာတ်မြုပ်ပီဇ ကွန်ဆောင်ပြု၍
 ဘဒ္ဒကမ္ဘာ မာန်လှိုက်ကာကို
 နိုင်ရာရွက်ထမ်း လူရွာခန်း၌
 စည်းကမ်းပညတ် ပရမတ်ဖြင့်
 ဆုပ်ကပ်ရုပ်လွှာ ဤခန္ဓာကား
 ဓမ္မာစီးဖြန်း သီရွာလမ်းပင်
 ဥာဏ်စွမ်းတစ သံဝေဂနှင့်
 မောဟမြီစာ ကြမ်းတမ်းလျှာကို
 လွန်စွာနှုတ်မြဲ ထွက်မဆဲရန်

ယှဉ်တွဲဟပြော နှုတ်ချိုရောသည့်
သိနှောဝန်းကျင် ခန္တီဝင်လျက်
အကြင်ရိပ်မြုံ ဂုဏ်ရည်ထုံမည်
မျိုးစုံထူးခြား ပုဂ္ဂိုလ်များလည်း
ခံစားလွှာချပ် ရုပ်တွင်ထပ်၏
သိတတ်မှုမှန် ခွဲခြားပြန်လျှင်
ကြံဖန်ကောင်းကျိုး လုံ့လကြိုးသင့်
အဆိုးထုတ်ပယ် တရားရည်ကို
ဖက်တွယ်ထိန်းသိမ်း ဒုက္ခငြိမ်းမည်။
ဆက်နွယ်စိတ်ကိန်း ဓမ္မယိမ်းမည်။ ။

ခိုင်ရိုးလ

ဝိရည်ပုလဲ လျှပ်စီးကြကေ
မဲညိုရန်ငြိုး ဒိန်းဒိန်းကြီးလည်း
နှိုးထရှင်သန် စွမ်းအားမာန်နန့်
ပန်သူမျှော်မှန်း ချရားပန်းရို့
နန်းလည်းမထိုက် သူ့အားစိုက်ကာ
လိုက်လျော့မှီးမြ ဝဿန္တတွင်။

နှင်းမြူဖြန့်ကြ မြိုင်လယ်ပွဲ၌
တွဲလွဲဝတ်ဆံ ပင်လတ်ယံမှာ
ညံသာသာမော ကျီသံနှော၍
တောနန်းဂုဏ်တင့် ပန်းပျံဆင့်ရို့
ပွင့်လန်းသဇင် ပန်းဘုရင်သည်
ဆင်ယင်ချယ်သ ဟေမန္တတွင်။

ဪ . . .

ဥတုရာသီ တောကိုမှီ၏
ရီမြီဖော်သင်း ရာသီပြင်းလည်း
သင်းမှီးထုံမြ ပန်းမန်လှရို့
ကြွကြွဖူးစုံ တို့ခိုက်ကြုံတိုင်း
ပုံခိုင်းကြိုးစား ဇွဲခွန်အားနှင့်
ကြားမြင်ဥာဏ်သိ ငါ့ရင်ငြိသည်။ ။

ခိုင်ရိုးလ

&၀၀၀၀၀၀

ကဆုန်/ကျွန်တော်

ကိုယ့်ရင်ကိုဟကြည့်မာ
မှောင်ရေ

ပုဒ္ဒက တရားနန်းပွင့်တုန်း။ ။

သျှင်ခိုင် (ရိုးမြီ)
၉ - ဇန်နဝါရီ - ၂၀၁၆

ပစ္စက္ခပန်းအယ်လ်ဘမ်တချပ်

(၁)

ပန်းတိပွင့်ကတ်ပျာ
များလိုက်စွာ . . .
တချို့ပန်းတိမာ အနံ့မပါ
တချို့ပန်းတိမာ အနံ့အကန့်အသတ်
တချို့ပန်းတိမာ အနံ့တိ
လောကနန့်မေထုန်မိဝဲနီယင့်။

(၂)

ကာလသုံးပါးက
သူ့အဝတ်ဟောင်းကို ပြောင်းပစ်ချင်ရေလတ်
ဆံခြည်မျှင်တိလေ့ ရှည်နီကတ်ပျာ
ဂေါင်းမဖြိုးရသိရေ ရက်တိ
ရုပ်ရှင်ရိုက်လို့ပျော်နီလိကတ်ယင့်။

(၃)

သာခြင်းဆိုပီးပါ
ငါနီရေနီမြိမာ
အနုပညာအပျိုစင်တိ သားမဖွားသိ
ကဗျာတပုဒ်မာ
ကမ္ဘာကြီးအသက်ရှည်ဆီးတိပါရေ။

(၄)

ေြာ် . . .

ယင်းကဏ္ဍတိ ငါနန့်မှမဆိုင်စွာကို
ပန်းတပွင့် သူတော်စင်ဝင်လခယင့်။

(၅)

ဒေနိထွက်တေ သတင်းစာတစောင်မာ
လူများစိတ်ဝင်စားသော သတင်းတပုဒ်
ကြွက်တကောင် ကားတိုက်ခံရရေလတ်။
လာကတ်ဝေရို့ . . . လာကတ် . . . လာကတ်
ဖျားယောင်းသွီးဆောင်မှုတိ
ဟိုတယ် မိုတယ်ကြီးရို့မာအစား
ပြီးကေ
နှိုက်ကလပ်မာ ဇိမ်ခနီကတ်ယင့်။

(၆)

ယင်းပိုင်နန့်
သံဒေပိုင်လူတိများသလောက်
မင်းသားကြီးရွှာန်းပိုင်လူတိ နည်းသထက်နည်း။
ယင်းပိုင်နန့်
ခရိုနီတိများသလောက်
ကက်စထရိုပိုင်လူတိ နည်းသထက်နည်း။
ယင်းပိုင်နန့်
ကဒါဖီပိုင်လူတိများသလောက်
မဟတ္တမဂန္ဓိပိုင်လူတိ နည်းသထက်နည်း။

(၇)

မာသာထရီစာက

ကျောင်းစာသတ်သတ်မဟုတ်ရပါ ဝေရို့။

မာကိုနီက

ဖတ်စာသတ်သတ်မဟုတ်ရပါ ဝေရို့။

အိုင်စတိုင်းက

သင်စာသတ်သတ်မဟုတ်ရပါ ဝေရို့။

အောင်ဆန်းသွီးအိမ်ထဲမှာ

သူ့သွီးဥတိရာဟိယင့်။

မော်စီတုံးရင်ဥယျာဉ်မှာ

သူ့သစ်ပင်တိရာဟိယင့်။

ဪ . . .

တီဆိုရေသတ္တဝါက မြီကိုချစ်တတ်တေလေ။

(၈)

ယင်းပိုင်နန်း

လောကပါလတရားထဲမှာ

ကုန်စီးနှုန်းတိ အဆမတန်ထိုးမြင့်။

(၉)

ယင်းပိုင်နန်း

မြို့ပြလူတန်းစားတချို့

အလဇ္ဇီသစ်သီးဝလံတို့ကို စားသုံး။

(၁၀)

ယင်းပိုင်နန်း

၂၃၀ သွီးမျက်ရည်တိခမ္ပာ
ထုံဆီးအထိုးခံရလီယင့်။

(၁၁)

ပျော်ကတ်တေ . . . ပျော်ကတ်တေ
တဝမ်းတခါးအတွက်
လှဘယက် တန်ဆာတိဂျည်းပွဲတော်တင်
ငိုကတ်တေ . . . ငိုကတ်တေ
တတိယကမ္ဘာက ဘဝတိ
ဆန်ပြုတ်တခွက်မာ အက်ဆစ်ရည်တိဆင်းစိမ်နီယင့်။

(၁၂)

မကြောက်ကတ်ပါကေ့ . . . မကြောက်ကတ်ပါကေ့
ဟိုချီမင်းက စာဖတ်တတ်ပြီးသား
ဒေးလ်ကာနက်ဂျီ၏ ပြဋ္ဌာန်းမူမာ
ပေါင်းစုအားခွန်တိ ခုန် ခုန်တက်တေ။

(၁၃)

ယင်းပိုင်နန့်
ဘဝစွာ အဂင့်ဂင့်ဘဝဖြစ်
တချို့ပန်းတိမာ အနံ့မပါ
တချို့ပန်းတိမာ အနံ့အကန့်အသတ်
တချို့ပန်းတိမာ အနံ့သင်းလို့
ပန်းတိပွင့်လာကတ်ပျာ။ IIII

သျှင်ခိုင် (ရိုးမြီ)
၁ - ဇူလိုင် - ၂၀၁၅

ငါက နာနာဘာဝပါ

ငါက
နာနာဘာဝပါ။

ငါ့ ရေိယာတနံတလျား
လေဗေဒပညာသျှင် မဟိ
ဂေါင်းခင်တလက်မာ တပျင်းမိုးခေါင်ရေ
သုတေသနပညာသျှင် မဟိ
သိပ္ပံပညာသျှင် မဟိ
ထပ်ပိုင်းကျိုးနီရေ စာပီတရပ်မာ
ကိုယ့်ကိုကိုယ် မောင်းနှင်နီလီယင့်။

စာကြည့်တိုက်က စာအုပ်တိ ခရီးမထွက်ဖူး
မိသားစု မဟိ
သူငယ်ချင်း မဟိ
အပေါင်းအသင်း မဟိ
၂၄ နာရီတင်းတင်းပြည့် မီးပြတ်ခံရရေ မြို့။

§Aspk

သမိုင်း

အရောင်မတောက်တေ ကြယ်အသီတလုံး။

တိမ်တအုပ်မာ အိမ် အိမ်ခြံ မဟိ

ကပ်ဆိုက်တေ ဆိုစွာ

ပင်လယ်ထဲကသဲတပွင့် ရှင်သန်ခြင်းမျိုးလားအမင်။

စေတနာတိ အဖျင်းများလိုက်တေ

မျက်နှာများတတ်တေ သင်္ချာဗေဒကျမ်းမာ

ဒန်းဂါးပြားတိ လူတောသူတောပေါက်လို့

လက်ဝတ်ရတနာငတ်မွတ်နီရေ ပြည်။

နည်းပညာတိ ပျက်လုံးလာထုတ်တေ

သံချိုးထပ်နီရေ ပြတင်းပေါက်မာ မိုးကျောက်မဟိ။

အီးယောင်လေး!!

ဒေနိ နီမထွက်သိစွာ

ရာဟုဆိုက်စွာထက်ဆိုးယင့်။

ငါက

နာနာဘာဝပါ။ ။

သျှင်ခိုင် (ရိုးမြီ)

၁၆ - ၄၄ - ၂၀၁၅

ဒေနီမသိလိုက်သော ကဗျာသစ်စစ်စစ်များနှင့်
ကျွန်တော်

မျက်စိက ချင်ပိုင်ခွန်ထွက်လခရေ
ပါးချင်ချင်နုနုဝီး
စိတ်ထဲ
အာရုံထဲ
မှတ်ဉာဏ်ထဲ
လွဲနီရေလမ်းစွာ လွဲနီရေယုံကြည်မှုနုနုမိတ်လိုက်တေ။

တခုလေ့မသိပိုင်ထိုင်းထိုင်းကြီးနီတတ်လာသော
အတို့အကြံများမာ တခုလေ့မသိခြင်းအနက်ကိုထွင်ရေ။

(+ * ?

မှတ်ချက်ချလိုက်တေ × = မာန
ဒေနီလေ့ ကိုယ့်နီနုနုကမ်းကွာရေ။

သျှင်ခိုင် (ရိုးမြီ)
၂- ဇန်နဝါရီ - ၂၀၁၆

စက္ကူတရွက်ကို ခွဲစိတ်ခန်းပို့လိုက်တေအခါ

မှင်ရည်တစက်နန့်
လောကအလီးချိန်ကိုရှာကြည့်ဖို့
'မင်္ဂလာပါ'လို့ မပြေလည်မှုတံဆိပ်ကပ် ဒေလူသား
ဒေကဗျာနန့် ပြုံးပြလိုက်တေ။

ဒေကဗျာထဲ
လေးဖက်ယိုင်သတ်ပုံနန့်ရွာလယ်ကစာသင်ကျောင်း
တဆောင်ပါချင်ပါဖို့။

ဒေကဗျာထဲ
ပန်းမခူးရဆိုင်းဘုတ်ဝင်ဝမာချိတ်ဥယျာဉ်တခုလုံး
ပိုးကိုက်ခံနီရသော ယဉ်ကျေးမှုအကြောင်း
ပါချင်ကေပါဖို့။

ဒေကဗျာထဲ
တရုတ်စွပ်ပြုတ်ခွက်ထဲ ပက်လက်မျောနီရေ
ပင်လယ်တစင်းအကြောင်းလေ့ပါချင်ကေပါဖို့။

ဒေကဗျာထဲ
အမင်မိုးတုန်းက အဖြူထည် ဇူဇကာလမ်းဆုံ
ဖြတ်အပြီးမာဖိနပ်စီးမှားလာသော ခြံနှစ်ချောင်း
လေ့ပါချင်ကေပါဖို့။

ဒေကဗျာထဲ
နောက်ဆုံးပေါ်စိုးနန့်ကြော်ငြာထားရေ
လူပျိုကြီး အပျိုကြီးရို့ Expired အလှကုန်ပစ္စည်း
အကြောင်းလေ့ပါချင်ကေပါဖို့။

ဒေကဗျာထံ

နိခရိခရိုးအောက်က တန်းခါးပိတ်ခါနီး
မိဘမေတ္တာဆိုင်အကြောင်းလေ့ပါချင်ကေပါဖို့။

ဒေကဗျာထံ

တယောက်တည်းမတည့်တိုင်း ရမိရရာပစ်ပေါက်
ဖူးသော ဓားတချောင်းလေ့ပါချင် ပါနိုင်ရေ။

ဒေကဗျာထံ

မိုးတုန်းကရွှီလောင်ပွန်းနုအချင်းဆီး
လင်လဆွီးနုဖူးစာဖတ်မှ စျီးဗန်းမချရရေ
သမီးသုံးယောက်မိခင်လေ့ပါချင်ပါနိုင်ရေ။

ဒေကဗျာထံ

ပြည်တွင်းဖြစ် စပါးနှံတံဆိပ်နု ငတ်မွတ်နီရေ
လယ်သမား ကြော်ငြာတိပါချင်ပါနိုင်ရေ။

ဒေကဗျာထံ

သပုံသုံးတောင့်နုနုဆီးမစင်ရေ အရက်သမား၏
အတွင်းကြံ အန်ဖတ်အကြောင်းပါချင်ပါဖို့

ဒေကဗျာထံ

စာချုပ်မပါဘဲအရောင်းအဝယ်လုပ်ထားသော
ဒုက္ခအကြောင်းပါချင်ပါဖို့။

ဒေကဗျာထံ

သိက္ခာထပ်ဖို့မိလာသော ဒေဖက်ခေတ် မနုဿ
ရိက္ခာအကြောင်းတိလေ့ပါချင်ပါဖို့။

ဒေကဗျာထံ

စီးပွားရေးတက္ကသိုလ်ကျောင်းထွက်
အရက်ဆိုင်သျှင်အကြောင်းလေ့ပါချင်ပါလိမေ။

ဒေကဗျာထဲ
ဆံပင်စိုက်လို့ရ သတင်းကျာနယ်ထဲ မျိုးတုန်းလားခရေ
ရိုးမသစ်တောအကြောင်းပါချင်ပါလိမေ။

ဒေကဗျာထဲ
၁၆နှစ်သားသမီးရွာကထွက် အိပ်ရေးပျက်လာသော
ဖခင်တယောက်အကြောင်းပါချင်ပါလိမေ။

ဒေကဗျာထဲ ဒေကဗျာ ပါချင်ပါလိမေ။

သမက်သျှင် (ရရိုးချေ)

ပိုးကျနီသော ကဗျာတပုဒ်

ဝတ်ထားရေ ပစ္စုပ္ပန်က ကျပ်လွန်းလို့
စိတ်တဝပ်စာ ကျွန်းထဲက
၅၂၈'တန်ခြပ်ပတ်တီးကို ဖွင့်ကြည့်လိုက်တေ
ဆီးမဖြစ်တေအကောင်က
ငါဖြစ်နီလီယင့်။ ။

သမက်သျှင် (ရရိုးချေ)

ဒိုင်နိုဆောတကောင်၏ ရာဇဝင်

- ငါ့အကြောင်းငါမပြောခင်အောက်ဆီဂျင်ကို
အယင်ပြောကောင်းဖို့လား။
- ဓာတ်လေးပါးအကြောင်းမပြောခင်သူ့အကြောင်း
ပြောကေကောင်းဖို့လား။
- အဝီးသင်မတက်ရခြင်းကိုခွီးသုံးခါကိုက်ခံရစွာ
လောက်မနာတတ်။
- ဥဩပျိုလှန့်ကေ မတ်တတ်ရပ်ယင်းပြုလဲကျရေ
အကောင်လေ။
- မင်းပြားတောင်ဝင်ရိုးစွန်းက
အဉ္စနမြစ်ရီအတက်အကျကို
- သူ့ဘဝနုနုယှဉ်ကြည့်နီခဖူးရေ။
- ရည်းစားခြောက်ယောက်ထက်ဂြတ်ဟင်းခါးသီး
ကိုပိုကြိုက်တေ။
- ရခိုင်သမိုင်းစာအုပ်ကို
ဆုံးအောင်မဖတ်
- ဘဲငိုတတ်တေအကောင်ပါ။
- အရပ်ငါးပေသုံးခါးသုံးဆယ်နှစ်၊ရင်သုံးဆယ်သျှစ်
စပါတာကတ်ရုပ်ရှင်ထဲက ဟီးရိုးကိုအားကျရေဆိုယင့်။
- အသည်းနှလုံးခန်းကလွဲကေ တကိုယ်လုံး
ညာသန်။
- ရီနှစ်ခါမြုတ်ဖူးရေ ရင်ဦးသည်းမီးကင်တုန်းကတခါ။
ဖိုးခေါင်ပျိုသစ်ကိုင်းဖြုတ်တုန်းက တခါ။

ဝိပဿနာပညာရေး

-အီးယောင်ကပြောရေ မောင်ချေ နင်ကားဟေ
ညောင်တုန်းထင်းပိုင် မီးခံရေလတ်။

-ဘာဘာနန့်အီးယောင်ရာမတွဲခကေ
ဒေကဗျာရွီးဖြစ်ဖို့မဟုတ်။

-ဥပမာအလင်္ကာနန့်စကားပြောရစွာထက် ဘဝမာ
မည်သံစွဲကိုမုန်းရေ။

အချေခါဇာတ်'က'တမ်းကဇာတ်ကေ ငါစွာဒါရိုက်တာ။

-မင်းသား ဇာနစ်ခုနှစ်ကပင်ပျောက်လားမသိပျာ။

-ချစ်သူကပြောရေ 'နင်ကောင်းမျက်နှာများရေလတ်'
ယကေလေ့ သူ့အတွက်တော့ခါ ကေဂီရီ။

-မျက်ရည်ထွက်လောက်အောင်ရယ်စရာ
ဇာတ်ကားတိပို့ဒြီရေ။

-မဟာဘုတ်အရကုန်သည်
ကိုယ့်ကိုကိုယ်အလီးခိုးရောင်းနီမုန်းမသိ။

-အမှတ်တရဆိုလို့ ပဆိုးမပါသောညည့်ပေါင်း ၁၇၀
နန့်အချုပ်ခန်း။

-ဒေကဗျာ စရွီးလောက်ကပင်အဆုံးဖက်ကိုဦးတည်နီပါရေ။

-တခုခုသီးခြားဖြစ်လာဖို့ နာမည်ကိုလောကထဲပို့လိုက်ရရေ။

-အကွရာဆိုစွာ ကဗျာထဲမာရာလှရေ
အပြင်မာကိုယ်တုံးလုံး။

-ဒေရုပ်လေ အမင်ပီးလိုက်တုန်းက အဖြူထည်ပါ။

-နူနာ လောကထဲလမ်းလားရစွာ အဂင့် ယားပါရေအမင်။

သမက်သျှင် (ရရိုးချေ)

ဥသြသံကြောင့် နှင်းစက်ကြီးရေ

(၁)

ရိုးရိုးသားသားမုန်းလိုက်ပါ နော်ရာ
ငါကနှင့်ဖွပ်ထားလို့သန့်နီရေ အလွမ်းနန့်မှ
ငါ့ကိုယ်ငါလူမုန်းသူမုန်းသိရေအကောင်လေ။

(၂)

ယုံလား နော်ရာ
ခြပ်ကြောင်းဆွီးမကြည့်ဝံ့လို့ ပတ်တီးမလဲဖြစ်စွာကြာပျာ
ဒေအနမ်းမျိုး မိတ္တူကူးခွင့်ရကေ
၂၀၀၃ ကိုအိတ်ထဲကောက်ထည့်ထားချင်သိရေ။

(၃)

အလွမ်းဆိုစွာလိပ်စာမဟိသော ဂြိုဟ်တခုလား
သူ့စွာသူ့ကြီးဆည်းဆာကို သတိရမှုပေါင်းများစွာတပ်
ရင်ဘတ်ထဲကာလာစပ်ရစွာ အဂင့်နာပါရေဝေ။

(၄)

တေးခြင်းတခြားတီးလုံးတခြား
စာသားဟောင်းတိကို နီရာပြောင်းကြည့်ရေ
ဒေအသံနန့်ဆိုကေ ရှင်သန်ခြင်းကိုအစားထိုးနှိုင်းဖို့လား။

(၅)

၁၆နှစ်သမီးနှင့်အချစ်က အပျိုစင်မုန်းသိပါရေ
ငါ့ကိုရိုးယား စကားမပြောတတ်ပါ
ငါကတိမ်တိုင်ကို လီကြိုးချိုင်လို့ ယိုင်းစီးချင်ရေအကောင်

နှင့်မေတ္တာအိမ်ထောင်စုစာရင်းထဲ
လုံလုံခြုံခြုံမှောင်ယဉ်။

(၆)

စိတ်ကိုသိပ္ပံကျောင်းထဲ ပို့လိုက်ရုံနန့်
အသည်းနှလုံးက စောင်းမလားနှိုင်းပါ နော်ရာ
ငါအကွရာဆင်းရဲမှန်းနှင့်သိပါရေ
ငါ့ကဗျာထဲ ဟာသမရောခစွာ စိတ်ချလက်ချ မှားရေ။

(၇)

နော်ရာ
ငါနှင့်အကြောင်းတိကို ဓာတ်ခွဲခန်းပို့လိုက်တေ
မနှစ်ကနီထက် ဒေနှစ်ပို့ပူလာရေပိုင်။

(၈)

ကဗျာဆိုစွာ အလွမ်းတိကိုနဖားထိုးကျောင်းဖို့
အကောင်းဆုံးသော လကမ္ဘာဖြစ်တေ
ငါ့စိတ်က ယင်းအကွရာထဲ ရက်ရက်စက်စက်ပုပ်တေ။

(၉)

မှတ်မိလား နော်ရာ
တနီရာရွတ်သော ညနီခင်းခမျာ
ပဒိုင်းပင်အောက် အမှောင်သောက်လို့ထော။

(၁၀)

ဒေဥသြသံစွာ ရထားမှန်းနို့မှန်း မကွဲပြားပါ
ရထားထွက်လားခရေ
ဥသြတွန်သံကြားရရေ
နီပြင်းပြင်းပူလာယဉ်။ ။

သမက်သျှင် (ရရိုးချေ)

လူ
ဖြစ်
ခွင့်
အ
ကွ
ရ
မ
တင်
ဖူး
သော

အက် ဒစ်(ထ်)မ ဖြစ် တေ 4+8 အောက် က

ပစ္စက္ခလကို တူးဆွမှုအနုလက် (Resources)
လှလိုက်တေ အမှတ်ပီးစနစ်တိ။

ဝံသ